


DIKUNZI

 Yina ke sala kima mosi ve na beno? Ya kieleka ya ke sala yawu. Beto kulumusa bayintu ya beto ntangu yayi samu na kusambila.

² Mfumu, mutindu yawu me tubama na beto na mukunga yayi ya kitoko, *Mutindu Nge Kele Nene*, mpe beto ke banza, na suka yayi, yinki beto ke sala kana ya vwandaka ve samu na Nge! Mpe kuna ntangu beto ke banza ti Nge kele nene mingi, mpe na yina zola ya Nge me tuma Nge na kubanza na beto, na yina moyo ya munu lenda simba yawu na mutindu ya kidimbu. Ya kele kieleka. Mu ke sambila ti Nge ke sakumuna beto bubu yayi, ntangu yayi na yina beto ke landila kisalu, ti Nge ke buka Dimpa ya Luzingu samu na beto, yina kele luzayikisu ya Klisto. Samu beto ke lomba yawu na Nkumbu ya Yesu. Amen.

³ Mpangi Ungren kele muntu yina ke kwisaka na tabernacle ntangu nionso. Mpe yandi ke zingaka na Memphis, na Tennessee, yandi mpe mama ya yandi, kento ya yandi. Mpe dibuta ya muvimba ke kwisaka na tabernacle. Mpe na mpasi mu ke kuwa yandi kuyimba, samu ti ya kele ntangu nyonso na bisalu mingi, kasi na suka yayi mu bakaka dibanza ya kuwa yandi kuyimba nkunga yayi. Yandi ke yimba yankaka, mosi ya bankunga ya mu ke zolaka, *Yandi Me Kulumuka Na Nkembo Ya Yandi*. Mpe yayi kele minkunga ya munu yina mu ke zolaka mingi. Mpe mu kuzwaka ntangu ya mbote ya kukutana na tata ya yandi, na suka yayi, mbala ya munu ya ntete mu me kuzwa ntangu ya mbote, bakala mosi ya mbote. Mpe—mpe Mpangi Ungren, tata ya yandi, ke—ke kwenda ata fioti ve ntangu nionso mwana ya yandi ya bakala ke zinga, Morris, samu ti bawu ke monana kieleka mutindu mosi.

⁴ Mpe kento ya yandi, Mpangi Morris Ungren, me zinga bamvula kumi na tanu yayi me luta na lemvo ya Nzambi. Kieleka yandi me vwanda lutwadusu ya nene ya kimpeve samu na munu, na kumona yawu; yandi me luta na banguna ya mpasi, mpe kasi yandi me kangama na diboko ya Nzambi yina ke sobaka ve. Ya ke tuba na beto muntu ya bukieleka ya Buklisto, mpe lukwikilu ya bayina ke kwikilaka yawu. Na yawu, mu ke na kiese mingi samu na yawu na suka yayi.

⁵ Beto salaka makwela, kuna na nsi. Zole ya bana ya munu me kwelana, mpe bana ya munu na tabernacle; Billy Simpson ya beto ya fioti mpe mwana-kento ya ba-Myers, bawu me zolanaka na mwa ntangu fioti; Sharol, yinga. Ba vwandaka . . . Bawu kele diaka bampangi awa, to ya kele Sharol Myers ya fioti, yina kele na kimpangi na Mpangi Ungren mpe dibuta ya yandi. Na yina, beto ke na kiese samu na bawu, mu ke mona ti bawu me baka

kisika ya bawu, na manima ba me kwelana, ba ke vutuka kuna na kati ya kivinga ya yinzo-nzambi, mpe ba me vutuka mbala mosi na lupangu ya dibuundu, mpe ba me vwanda samu na kuwa dilongi. Bana yayi ke vwandaka ntangu nionso na kisika na kati ya ntima ya munu, samu bawu kele na luzitu mingi samu na Ndinga. Bawu—bawu ke zolaka Ndinga. Mu ke banza mutindu yina ve, ti mu ke bokilaka bawu bana ya munu, mu ke banza ve ti bawu kele ya kulutula bana yankaka. Kasi bawu ke talaka na munu, mpe mu—mu—mu ke talaka na Nzambi samu na bawu.

⁶ Billy ya fioti zolaka kwelana, na manima yandi vwandaka na boma ti yandi zolaka kwenda na makesa. Mpe ya vwandaka na zola to tatu na kati ya bawu mutindu yina. Mpe bana-bakala yina kwisaka na munu, mpe bawu tubaka, “Mpangi Branham, beto—beto zola ve kutina to kima yankaka, kasi beto ke zola ti nge yufula Nzambi.” Mpe bawu tubaka na munu samu na yinki ba ke zola kuvwanda ntama na makesa, kana bawu lenda; ve samu ti bawu ke zolaka ve kunwanina yinsi, na kima nyonso yina bawu lendaka sala. Kasi diambu vwandaka, ti kana bawu—kana bawu me kwenda, bawu zolaka kota na mutindu ya yimbi ya bantu kuna na kati ya yayi (Mu zaba ve yina beno ke bokilaka yawu) PX, to nionso yina beno ke bokilaka yawu, mpe na yina ba ke kwenda kuna kisika bakento yina kele ndambu kinkonga ke zingaka luzingu ya yimbi. Yina kele ve kisika ya mwana-bakala ya Muklisto, mpe na yina Nzambi pesaka mvutu na lombilu ya bawu.

⁷ Mpe ntangu yayi Billy ya fioti me kwisa na suka yayi, samu na kukwelana na Sharol ya fioti ya kitoko, na yina beto ke na kiese samu na bawu. Mpe beto ke sila bawu bansilulu ya kulutula mbote na Kimfumu ya Nzambi, samu na bawu.

⁸ Mpe ntangu yayi yayi me vwanda ntangu mosi ya kitoko samu na beto. Beto me kuzwa lukolo ya Lumingu ya mbote awa na suka yayi, yinzo-Nzambi vwandaka ya kifuluka, na yina beto ke na kiese mingi. Mpe bambala mingi, balongi, ya—ya ke pesaka beto kikesa na kumona bantu kukwisa kuwa beno. Samu, beno me mona, beno ke zolaka ve kuzonza na bakiti ya mpamba, samu ti bawu kele. . . Beto ke longa kaka mutindu mosi kana ya kele ve na muntu mosi awa. Kasi ya ke monana mbote ntangu beno ke banza, “Kana *yayi* me kondwa yawu, yankaka ke kuzwa yawu.” Beno me mona. Mpe ya ke sala yawu ya kuswaswana, ya ke sala yawu ya nkembo.

⁹ Mpe ntangu yayi, kaka na masolo ntangu yayi, yayi kele, kana beto lenda zonzila yawu na nswalu nionso.

¹⁰ Mu kutanaka na Mpangi Boulière ntangu mu basikaka, mpe mu me monaka yandi ve kubanda mu me vwandaka awa. Mu tubaka, “Wapi kisika nge me vwanda?”

Yandi tubaka, “Mu vwandaka yidika madia ya midi samu na bawu.”

Mpe na yina mu tubaka na yandi ti mu me zimbisa bakilo. Yandi tubaka, “Nge?”

Mu tubaka, “Nge me sobaka ata fioti ve.”

Yandi tubaka, “To nge mpe me sobaka ve.”

¹¹ Mu tubaka, “Yina kele kieleka na mayele mingi.” Mu tubaka, “Kasi, nge zaba, mu me soba. Mu me luta na makumi nana ya bakilo, na makumi sambanu na nana, na yina ya kieleka mu me soba.” Bakazaka ya munu nionso, diaka, me kuma fioti nene samu na munu. Mpe muntu mosi sumbaka mosi samu na munu, na yina mu lendaka kulwata yawu awa; kazaka mosi yina ke lunga ve na zulu ya mapeka, mpe yina ke mata ve mingi na nene.

¹² Kasi mu ke—mu ke meka na kusala nionso samu na Yesu Klisto na yina mu ke na siansi ya kusala yawu. Mpe mvwandulu ya beno ya mbote!

¹³ Mu vwandaka tuba na kati ya kivinga kaka ntangu yayi, mu monaka Mpeve-Santu ya nene kukatula cancer na nzutu ya kento mosi, kaka na kati kuna. Yandi kele—yandi kele kento ya Texas. Mpe mama mosi vwandaka kuna, mu me monaka ata fioti ve muntu mosi ya kudasuka mingi, kento ya mulongi, kaka mwa ntangu fyoti me luta. Mpe Mfumu talisaka munu vision ya yandi yina vwandaka kuna, mpe mu monaka yandi. Yandi bokilaka na New York, mpe yandi zolaka kukwisa awa. Yandi vwandaka kaka na minuti tanu, na yina mu monaka bakala ya yandi yina vwandaka na mputa na kifundu, mpe yina salaka mputa yina vwandaka ti yandi vwandaka na souci mingi samu na kento ya yandi. Nzambi ya Ngolo nionso, lembikaka kento yina vwandaka kuna. Yandi kele ya kuvwanda, ke na kutala munu ntangu yayi. Na yina, mpe dyaka mu zola kutuba na nge, mpangi-bakala, mputa ya nge na kifundu me kumana. Beno me mona? Yinga, nge ke beluka ntangu yayi mpe nge ke vutuka na kisalulu ya Mfumu.

¹⁴ Ntangu yayi, ntangu beno ke mona kima yina Mfumu ke sala, beno—beno lenda ve kufulusa yawu. Beno ke zola kaka kulandila na kukwenda, kukwenda, kukwenda, kukwenda.

¹⁵ Mpe, ntangu yayi, mazono na nkokila beto vwandaka na lukutakanu ya nene ya bisambu, mpe ya kele mbote, ya kele mbote. Mu ke tentika maboko na zulu ya bambevo, ya kele kima ya mbote. Ya kele nyonso yina ya ke lombaka, na bantangu yankaka. Na yina ya kele na bayina kele na kima mosi kuna na luzingu ya bawu, ti bawu—bawu lenda ve kubakula, mpe beno fwana kuzwa muntu yina mpe kuzaba yina ya kele. Beno me mona, ya kele na kima mosi yina me bumbama na manima ya bawu, kima mosi ke kanga bawu nzila. Mpe mwa kivudi mosi ya fioti ke nata yawu ntama.

¹⁶ Ntangu yayi, mama yayi ya ntwenia kuna na mwa ntangu fioti me luta, yandi vwandaka na kidi-kidi mingi, ya kudasuka mingi. Mwana-kento yayi ya mputu, yandi lendaka ve kuzwa

pema ya yandi. Yandi vwandaka sala kaka, “*fuu, fuu,*” mpe vwanda landila kaka—kaka mutindu yina, beno me mona.

¹⁷ Ntangu yayi, kima beno fwana sala. Beno tala mwa dibanza fioti, beno me mona. Ya ke lomba kukanga mpeve ya yandi. Beno me mona? Mpe na manima beno ke lakisa na yandi dibanza ya kieleka ya beno. Beno me mona? Mpe beno ke soba mabanza ya beno. Beno me mona? Na yina ntangu ya ke sala mutindu yina, na yina beno lenda benda bukebi ya yandi na Klisto, mpe kubanda kuna yandi lenda kwenda na ntuala. Kasi beno fwana soba mutindu ya yandi ya kubanza, beno me mona. Yandi lenda soba yawu ve yandi mosi. Yandi me kota kaka na kati ya kitembo, mpe beno fwana tala yawu. Ntangu yayi ya kele na mwa kima yina ke pesaka beno. . . . Beno meka ve na kulongoka yawu; beno sala yawu ve. Beno kwikila kaka yawu mpe beno kwenda na ntuala.

¹⁸ Wapi mutindu mwa bébé yina, vwandaka kuna na maboko ya bamama yina, yandi kufwaka kubanda ngunga ya yivwa na suka yina, mpe kaka ntama kuna na kati ya mpimpa na nkokila yina, wapi kisika vwandaka mwa mpeve yina? Beno fwana kwenda sosa mpeve yina mpe kuvutula yawu. Na yina ntangu beno ke mona yawu kuvutuka, na yina beno lenda telema na Nkumbu ya Mfumu mpe kubokila yawu. Beno me mona, na yina ya ke salama. Kasi tii kuna beno ke sala mutindu yina, beno ke zimbisa pema ya beno, beno me mona.

¹⁹ Ya ke kima mosi ve—kima mosi ve ya mansweki. Ya kele kusosa Nzambi, kukatuka beno mosi na nzila mpe kubika Mpeve-Santu kusadila beno mutindu nionso Yandi zola kusala. Yawu yina. Kima ya mfunu mingi, ya dikabu nionso, kele kubasisa mabanza ya beno na nzila, mpe kubika Klisto. Na yina nyonso yina Yawu ke tuba, kana beno zola kuzaba kana ya kele Klisto to ve. . . . Kana ya kele kaka sensation, beno bika yawu swi. Kasi kana ya kele kaka emotion, beno bika yawu swi. Kasi kana ya kele ya kusonika na kati ya Ndinga, kuna ya kele Nzambi. Ntangu nionso beno ke tala konso kima yina, mpeve yina ke tuba na beno, na nzila ya Ndinga. Ndinga, beno kwenda ata fioti ve ntama na Ndinga yayi; kana beno sala yawu, beno me zimbana.

²⁰ Ntangu yayi, na kisika beto bikana tii na kati-kati ya mpimpa, na kutuba kaka mutindu yayi, beto baka kaka Biblia mpe beto tanga mwa Masonuku awa. Mpe na manima beto ke. . . . Mu ke zolaka Ndinga ya Nzambi. Mu zaba ti beto nionso ke sala yawu. Ntangu yayi mu me. . . .

²¹ Mu zolaka longa, na suka yayi, to kuzonza, kulonga lukolo ya Lumingu, na zulu ya mansweki ya kubumbama ya Nzambi kubanda mbatukulu ya yinza, yina me monisama na Yesu Klisto. Mpe mu me zwaka ve siansi samu na kutubila yawu nionso. Mu me zimbana makwela yina ke na kwisa, na yina mu—mu banza ti mu ke zonzila yawu na ntangu yina ke kwisa.

22 Ntangu yayi mu ke tanga bisika tatu na kati ya Biblia. Ntete, mu zola tanga na ba-Phillipiens 1. Kapu ya 1 ya ba-Philippien, kubanda na nzila ya 19, mpe kutanga diaka tii na nzila ya 22.

Samu mu zaba ti yayi ke luta na mpulusu ya munu na nzila ya bisambu ya beno, mpe lusalusu ya Mpeve ya Yesu Klisto,

Landila lufutu ya munu yina ke vingila mpe kivuwu ya munu, ti mu ke vwanda na nsoni ve, kasi na kikesa nionso, mutindu ntangu nionso, kubanda ntangu yayi Klisto ke monisama na kati ya nzutu ya munu, to na luzingu ya munu, to na lufwa ya munu.

Samu na munu kuzinga kele Klisto, mpe kufwa kele ndandu.

Kasi kana mu ke zinga na kati ya nzutu, yayi kele mbuma ya mpasi ya munu: na yina mu . . . zola ve.

23 Ntangu yayi kuna na Buku ya ba Romain. Mpe beto zola banda na kapu ya 8 ya ba-Romain, mpe na nzila ya 35, samu na kutunga yina mu zola baka samu na dilongi.

Nani ke kabula beto na zola ya Klisto? ya ke vwanda balukwamusu, to kiadi, . . . bampasi, . . . nzala, to kinkonga, . . . lufwa, . . . mbele?

Mutindu ba me sonikaka, Samu na munu ba ke kufwa beto nionso . . . konso kilumbu; ba ke tala beto mutindu mameme ba ke nata na abattoir.

Kasi, na bima yayi nionso beto kele ya kulutula minungi na yandi yina zolaka beto.

Samu mu me ndima, ti ata lufwa, to luzingu, to wanzio, to kimfumu, to ngolo, to bima ya ntangu yayi, to bima yina ke kwisa, to . . .

To bunda, . . . mudindu, to kivangu yankaka, lendaka kabula beto na zola ya Nzambi, yina kele na kati ya Klisto Yesu Mfumu ya beto.

24 Na Actes 2, mpe nzila ya 30:

Na yina na kuvwandaka profete, mpe na kuzabaka ti Nzambi pesaka yandi nsilulu na ndefi, ti mwana ya yandi, landila nzutu, yandi ke telemisa Klisto samu na kuvwanda na kiti ya yandi ya kimfumu;

25 Ntangu yayi yayi ke sala Masonuku mingi, mutindu beto me luta kisika mosi na yankaka, na kati ya Biblia. Kasi beto zaba ti, kana ba me tanga Masonuku yayi, beto ke mona kima mosi na kati Kuna yina ke—ke sadisa beto. Ntangu yayi bika ti Nzambi kusadisa beto ntangu yayi, mutindu mu zola baka yintu ya dilongi yayi, na suka yayi, mpova ya dikunzi: *Dikunzi*.

26 Ntangu yayi beto, ntangu mu vwandaka tala dilongi yayi, mu kwendaka na dictionnaire. Mu banzaka, “Yinki? Muntu

mosi vwandaka tuba ntangu nionso, “Ya kele dikunzi, kieleka. Ya kieleka, yayi kele mutindu yina.” Mu banzaka, “Yinki kele mpova yayi? Yinki ya zola tuba, *dikunzi*?” Mpe mu kwendaka na dictionnaire samu na kuzaba yina ya zola kutuba.

²⁷ Webster me tuba ya kele “ya kulunga na yawu mosi, ya kukonda nsuka na ngolo, ya kele kisika ya kutudila ntima.” Beno me mona, “yina kele kukonda nsuka na ngolo ya yawu, ya kulunga na kati ya yawu mosi, mpe ya kele kieleka kisika ya kutudila ntima,” mpova yayi *dikunzi*.

²⁸ Mpe mu ke zola kutuba yayi, mpe mu ke na kivuvu ti beno ke simba bampova yayi, samu ti mu kele ve nganga-Nzambi yina me longokaka mingi samu na yina me tala bampova mpe mutindu ya yawu, mpe mutindu ya psychologie samu na kunata kima ya nene yina ke simba bantu. Kima mosi kaka mu ke sala, kele kumeka kusala ya kulutila mbote yina mu lenda, samu na bankundi yina Klisto me pesa munu, mpe mu—mu—mu zola bawu kumona yina dibanza ya munu kele samu na Klisto.

²⁹ Ntangu yayi, kimalu nionso ya nene me kangama na dikunzi mosi. Beno lendaka ve kutwadisa luzingu kukondwa kuvwanda na dikunzi mosi. Beno lendaka ve kusala kimalu mosi kukondwa yawu kuvwanda na dikunzi, samu ya kele kisika ya nsuka ya kukangama na yawu. Ya kele—ya kele ndobo kisika nionso ke kangama na nsuka ya nzyetolo. Ya kele kisika beno kele ya kukangama na kima mosi.

³⁰ Na kilumbu yayi beto ke na kuzinga ntangu yayi, mpe bima nionso ke na kubeba mingi, ya kulemba mingi mpe me natama, mu banza ti Nsangu yayi ke vwanda kieleka kima ya mbote, mingi-mingi samu na Baklisto ntangu bawu ke luta na kati ya bamasa ya bawu ya mudindu ntangu yayi. Dibundu ya Baklisto ke na kuluta na kati ya maza ya mudindu mingi yina yawu me lutaka ntete ve bamvula mafunda zole yayi me luta. Samu ti, beto me kuma na kisika yina ya kele na kima yina ba me pesa na Buklisto, kima yina ba fwana baka lukanu samu na yawu, mpe mu banza ti dibundu ya Baklisto fwana kuzwa kima mosi yina bawu zaba ti bawu kele ya kukangama na yawu, na kisika kaka ya kutepa-tepa mutindu matiti na zulu ya masa, mupepe. Mutindu Biblia ke tuba, “Me bendama na mupepe nionso ya malongi.” Mipepe ke kwiza mpe ke ningisa mwa dititi mutindu *yayi*, mpe na manima mupepe yankaka ke kwiza, mupepe ya nord, mupepe ya sud, mupepe ya este, mupepe ya weste. Beno ke kuma ata fioti ve kisika mosi, beno kele ve ya kuvwanda. Luzingu ya Buklisto fwana vwanda luzingu ya kuvwanda. Yawu fwana kima yina—yina kele musiku mosi yina—yina beno me kangama na yawu, yina kele kulutila luzingu yawu mosi.

³¹ Mpe beno fwana kuzwa kima yina beno kele ya kukangama na yawu. Bantu yankaka kele ya kukangama na mumbongo ya bawu. Bayankaka kele ya kukangama na mabuta ya bawu.

Bayankaka kele ya kukangama na credo. Bayankaka kele ya kukangama na kisika ya bawu na makesa. Beto kele na bima ya kuswaswana yina beto kele ya kukangama na yawu. Kasi mu banza, mutindu Muklisto, beto fwana vwanda ya kukangama kisika beto zaba ti ya kele kieleka, beno me mona. Samu ti, beno lenda vwanda ya kukangama na dibuta ya beno, mpe kento ya beno—ya beno lenda bika beno. Beno lenda vwanda ya kukangama na makesa, mpe ba lendaka kufwa beno. Mpe beno lenda vwanda ya kukangama na bima yankaka, mpe ya kele na nsuka. Kasi ya fwana vwanda na kisika ya nsuka ya kukangama na yawu. Ya fwana vwanda kisika yina—yina muntu fwana kangama samu kisika ya yandi ya Kukonda nsuka. Samu ti, kana beno ke tula kivuvu na yawu na ksalu ya beno, ntangu ksalu ya beno me suka, yimeni. Ntangu ba ke baka dibuta ya beno, ya me suka.

³² Kasi kele na kima mosi kaka yina mu ke banza kele kisika ya nsuka ya kukangama na yawu. Mpe mu ke kwikila ti Paul wandaka na kisika ya kukangama na yawu na luzingu ya yandi awa na ntoto. Mpe mu ke zola ku—kukotisa mpova mosi kuna na kati, kana beto zolaka tuba yawu mutindu yina, mpe kutubila kisika yina ya kukangama na yawu. Yandi tubaka, “Samu na munu kuzinga kele Klisto, mpe kufwa kele ndandu.” Ntangu yayi, Klisto wandaka Dikunzi ya Paul. Yawu wandaka kisika ya yandi ya kukangama na yawu. Yawu wandaka ya yandi. . . Yawu wandaka nsuka ya bansamunu nionso. Ya wandaka Klisto, yina wandaka kisika ya yandi ya kukangama na yawu.

³³ Paul wandaka ntangu nionso ve na kisika yina ya kukangama na yawu. Yandi wandaka tula ntima na kimvuka ya ba-Pharisiens. Mpe ba longusaka yandi mpe longaka yandi, samu ti bawu kundima yandi mpe kubika yandi kutula ntima na dikunzi ya bawu. Kasi kilumbu mosi yandi wandaka na nzila ya Damas, mpe yandi kutanaka na Yesu, mbunzu na mbunzu. Mpe kubanda kuna yandi bukaka kisika ya yandi ya kukangama na yawu ya ba-Pharisien; mpe yandi kangamaka diaka, ti Yesu Yina yandi zabaka ba komaka Yandi na kulunsi, kufwaka, mpe vumbukaka diaka. Paul zabaka yawu samu yandi kutanaka na Muntu yango. Yina sobaka yandi kuna. Yandi wandaka ata fioti ve mutindu mosi kubanda na ntangu yina. Yandi kutanaka ata fioti ve na buku mosi. Yandi kutanaka ata fioti ve na credo mosi. Yandi kutanaka na Muntu yayi, Yesu Klisto. “Nani Nge kele, Mfumu?”

Yandi tubaka, “Munu kele Yesu.”

³⁴ Beto banza na kundima yina, na mwa ntangu fyoti. Mu banza ti Paul wandaka muntu ya kusungama. Na yina yayi kele lukolo ya Lumingu, beto zola kulonga yawu mutindu lukolo ya Lumingu. Paul, mu banza, wandaka muntu ya kieleka, ya kusungama, mpe ya wandaka—ya wandaka ve na kima

mosi samu na yandi yina vwandaka ya kuswaswana na muntu yankaka.

³⁵ Bapofete yayi nionso vwandaka kaka bantu mutindu beto. Biblia me tuba mutindu yina. Santu Jacques 5, “Elie vwandaka muntu yina vwandaka na bampusa mutindu beto,” yandi vwandaka na bakumata ya yandi mpe bakukulumuka ya yandi, yandi vwandaka na kati mpe na nganda, “mpe yandi sambilaka na kivuvu ti mvula kunoka ve.”

³⁶ Mpe Paul vwandaka muntu mutindu beto. Yandi vwandaka na baboma ya yandi, bantembe ya yandi. Mpe yandi vwandaka muntu ya kieleka. Yandi vwandaka kwenda na mosi ya mabuundu ya bansambulu ya kulutila kitoko yina vwandaka na yinza. Mpe yandi zolaka kuma mulongisi ya dibuundu yina; yandi longokaka na nsi ya mulongisi ya nene, Gamaliel, yina vwandaka mosi ya milongi ya kulutila nene yina bawu kuzwaka na kilumbu yina. Bibuti ya yandi monaka yawu, monaka ti ya vwandaka na kima mosi na luzingu ya Paul, mpe salaka kingolongo ngolo samu na kutinda yandi na lukolo, ti yandi lendaka longoka misiku nyonso ya Nzambi. Mpe, na kieleka ya mudindu, yandi kwikilaka konso mpova ya yawu.

³⁷ Mpe yandi kuwaka mutindu yayi ya nkonga ya bantu ya nsi mingi, mpe bawu vwandaka na profete, mutindu ba me bokila, na kimvuka ya Yandi, yina me telema na Galilée, yina zolaka sala bimangu mpe kubelusa bambevo. Kasi dibuundu ya yandi—ya yandi yina yandi vwandaka zolaka ve kundima ti Muntu yayi vwandaka profete, Yesu yayi ya Nazareth, samu Yandi talisamaka ve Yandi mosi na bawu. Na yina Paul lendaka ve kundima nionso yayi, samu ti bantu ya—ya dibuundu ya yandi vwandaka kwikila ve na Yawu. Mpe ba kebisaka yandi samu na diambu ya mutindu yina.

³⁸ Mpe Paul, na kuvwandaka ya kusungama, banzaka, “Kana diambu yayi kele ve ya Nzambi, mpe dibuundu ya munu me tuba ti yawu kele ve ya Nzambi, na yina ya kele kaka na kima mosi ya kusala, ya kele kukatula yawu.” Yandi tubaka, “Beno katula yawu na nzila, samu ya kele. . . ya ke vwanda disakuba, ya ke vwanda kivimbu, kivimbu ya mayele ya yimbi,” ya vwandaka ya kuswaswana na lukwikilu ya dibuundu ya yandi. Na yina yandi bakaka lukanu na ntima ya yandi na kukwenda kuna mpe kukatula “kivimbu” yayi, mutindu yandi bokilaka yawu, to dibuundu ya yandi bokilaka yawu, ntama ya kimvuka ya Yandi ya ba-Pharisien.

³⁹ Kilumbu mosi, na mikanda na posi ya yandi, yina me katuka na nganga-Nzambi ya mbuta, samu na kukanga bantu yina nionso vwandaka na mutindu yina, samu ti ya vwanda kisalu yina Paul zolaka sala mbote-mbote. Yandi vwandaka na nzila ya yandi kuna na mbanza yina ba vwandaka bokila Damas. Ba vwandisaka bawu swi, bisika nionso na Jérusalem. Na yina

yandi vwandaka—yandi losaka matadi na Étienne, mpe Paul vwandaka losa yandi matadi, pesaka kimbangi mpe simbaka kazaka. Ntangu yayi yandi vwandaka kulumuka kuna mpe kusala kima ya mutindu mosi, mpe kukatula disakuba yayi ya nene.

⁴⁰ Kasi kuna, pene ya midi, pene ya ngunga ya kumi na mosi, ngunga ya kumi na zole, ba losaka yandi na ntoto. Mpe ntangu yandi salaka yawu, yandi talaka na zulu mpe ya vwandaka na Nsemo mosi yina vwandaka ya kutelama na ntwala ya yandi. Mpe Ndinga basikaka na Nsemo yayi, na kutubaka, “Saul, Saul,” kyuvu, “samu na yinki nge ke na kutalisa Munu mpasi?” Ntangu yayi Paul zabaka, to Saul, mu zola tuba, zabaka ti bantu ya yandi vwandaka landa Nsemo yina kubanda ntangu bawu basikaka na Égypte. Mpe kana . . .

⁴¹ Beno me monaka ntete mbangululu ya Biblia ya Lamsa, ya ntama . . . Kidimbu ya ntama ya Hebreux ya—ya Nzambi kele Nsemo ya triangle; kulutila to fioti, kima ya mutindu *yina*, ti bisalu tatu ya Nzambi, na kati ya Bunzambi mosi. Mpe Nsemo yayi vwandaka na mutindu ya triangle tatu, tatu kati na Mosi, vwandaka Nzambi mosi, vwandaka kidimbu samu na ba Hebreux, yina vwandaka talisa Nzambi, Nsemo.

⁴² Mpe kuna ntangu Moïse kukutanaka na Yandi na mulaka, na yina Yandi tubaka, “MU KELE,” yina kele mutindu mosi, tatu; mazono, bubu yayi, mpe kukonda nsuka, kaka Nzambi mosi. Mpe Moïse kutanaka na Yandi na mulaka ya tiya. Yandi vwandaka Nsemo. Mpe ntangu Yandi twadisaka bana ya Israel na ntoto ya kuyuma, Yandi vwandaka Wanzio ya ngwisani, ti Moïse na lukwikilu monaka, mpe basikaka na Égypte, yandi talaka ti nsoni ya Klisto vwandaka kimvwama ya nene mingi kulutila yina ya Égypte. Na lukwikilu, Moïse monaka ti yina vwandaka Klisto, Kupakulama. Mpe Kupakulama vwandaka na zulu ya muntu mosi ve, kasi Yawu vwandaka na mutindu ya Dikunzi ya Tiya. Beno me mona?

⁴³ Mpe na yina Kupakulama yina mosi kulumukaka na mbotika ya Yandi, mpe kotaka na Klisto mpe zingaka na kati ya Yandi. Jean zabaka ti ya vwandaka Yandi. Yandi tubaka, “Na zulu ya Yandi beno ke mona Mpeve yina twadisaka bawu na nganda ya Égypte na ntoto ya kuyuma, mpe kuna na ntoto ya kuyuma na kati ya yinsi ya nsilulu, na zulu ya Yandi yina nge ke mona mutindu yayi ya triangle ya Nzambi ke kulumuka mpe ke vwanda na zulu ya Yandi, Yandi kele Yandi yina ke botika na Mpeve-Santu mpe Tiya.”

⁴⁴ Ntangu yayi Paul kuzwaka ntete ve siansi ya kumona yayi. Kasi kaka samu na kusala yawu ya kieleka, samu na beno, ba pekisaka ba-Juif na kufukimina kiteki, to kima ya mutindu yina! Ntangu yayi ntangu yandi monaka Nsemo yayi ya nene, yandi zabaka ti yina vwandaka Mfumu. *Mfumu* zola tuba “kima ya

beno, kuyala.” Yandi—yandi zolaka bokila kaka kima mosi ve “Mfumu,” Hébreux ya kukwikama yina, ntangu yandi zabaka ti Yina vwandaka Mpeve. Kasi beno tala, yandi zabaka ti Dikunzi ya Tiya mosi yina vwandaka Yina twadisaka bantu ya yandi. Mpe na yina yandi vutukaka mpe ke tubaka, “Mfumu, Nani Nge kele? Nani Nge kele? Mu zola zaba Nani Nge kele. Nge kutanaka na Moise na nkumbu ya ‘MU KELE.’” Kasi mu ke telema kuna na dibanza ya bawu, na mwa muniti fioti.

⁴⁵ Yesu, ntangu Yandi vwandaka na zulu ya ntoto, ya kupakulama na Yawu yina bawu monaka, beno tala, Yandi tubaka, “Mu me katuka na Nzambi,” Mpeve, Nsemo, Dikunzi ya Tiya, “mpe Mu ke vutuka na Nzambi.” Mpe Yandi kumaka muntu samu na kufwa samu na masumu ya beto. Na yina na manima ya lufwa ya Yandi, luzikulu, mvumbukulu, mpe nzanguka, na manima Yandi me mata; na bilumbu makumi yiya, Yandi me mata; mpe na kilumbu ya makumi tanu, Yandi vutukaka na mutindu ya Dikunzi ya Tiya, na kati ya bantu, mpe kukabukaka Yandi mosi, mutindu baludimi ya tiya, mpe vwandaka na zulu ya mosi na mosi ya bawu. Mpe kuna bawu nyonso fulukaka na Mpeve-Santu, mpe bandaka na kuzonza na bandinga yankaka, mutindu Mpeve vwandaka twadisa bawu na kuzonza.

⁴⁶ Beno me mona, Nzambi kabukaka Yandi mosi; Nzambi ntete na Dikunzi ya nene ya Tiya; Nzambi monisamaka na kati ya nzutu ya muntu; ntangu yayi Nzambi kabukaka Yandi mosi na kati ya bantu ya Yandi. Dikunzi ya Tiya me kabwana, mpe me vwanda na zulu ya mosi na mosi ya bawu, mutindu bansomo ya kukabuka na tiya, baludimi ya kukabuka vwandaka na zulu ya bawu, bansomo ya tiya, baludimi ya kukabuka mutindu tiya vwandaka na zulu ya mosi na mosi ya bawu. Mpe bawu nionso fulukaka na Yawu, mpe bandaka na kutuba bandinga, mutindu Mpeve vwandaka twadisa bawu na kuzonza.

⁴⁷ Ntangu yayi, beno me mona, beto kele ve bantu ya kukabuka, beto fwana vwanda na kimvuka, samu ti mosi na mosi ya beto ke na kusimbaka kitini ya Nzambi. Mpe beto fwana vwanda kintwadi, mpe na yina Dikunzi ya Tiya me monisama ya muvimba, mpe ya kifuluka ya Yawu; ntangu Dibuundu ya Yandi ke vwandaka kintwadi na bisika ya Mazulu, na yina muvimba ya ngolo ya Nzambi kele na kati ya Dibuundu ya Yandi. Mosi na mosi ya beto ke simba makabu ya kimpeve mpe bisalu ya kimpeve, beto ke vukana, beto ke nata diaka Dikunzi yayi ya Tiya.

⁴⁸ Mpe Paul kuzabaka ti yina vwandaka ya Mfumu, mpe yandi tubaka, “Mfumu, Nani Nge kele, kana mu ke na kutalisa Nge mpasi?”

⁴⁹ Yandi tubaka, “Mu kele Yesu, mpe ya ke vwanda mpasi samu na nge na kumanga bansende.”

⁵⁰ Mpe Paul kuzwaka lutumu ya kutelama mpe kwendaka na bala-bala yina ba bokilaka, “Droite.” Mpe ya vwandaka na profete mosi kuna yina kwisaka, na nkumbu ya Ananias, mpe monaka vision, mpe botikaka yandi. Mpe yandi kwendaka kuna na Arabie, bamvula tatu, samu na kulongoka Masonuku, samu na kumona na yina Dikunzi ya Tiya yayi vwandaka yina monikaka na yandi.

⁵¹ Ntangu yayi beto ke mona ti Paul, luzingu ya yandi nionso, vwandaka na yawu mutindu kisika ya kukangama na yawu. Yandi kutanaka na Nzambi, mbunzu na mbunzu, mpe ba tumaka yandi na Nzambi. Wapi kisika yayi ya kukangama na yawu! Wapi Dikunzi yayi! Yina vwandaka nsuka ya bakuswana nionso. Yina vwandaka nsuka ya bima nionso samu na Paul. Kuswana nionso, bima nionso vwandaka me kwenda. Mu ke kipe ve yina ba-Pharisien tubaka, ba-Sadducéen tubaka, to muntu nyonso yankaka; yandi kutanaka na Nzambi yina me siamisama na nzila ya Ndinga, yina sukisaka yawu! Yina vwandaka luzingu ya yandi nionso. Samu yandi monaka Nzambi me monisama, mpe me ndimisama na yandi ti Yawu vwandaka Nzambi, na nzila ya Ndinga, mpe na nzila ya ntela mpe mutindu yina Yandi vwandaka, mpe na nzila ya Ndinga ya kieleka yina tubaka na yandi kieleka yina ya vwandaka. Ntangu yayi, yina vwandaka kima ya nene. Kuyituka ve ti yandi lendaka tuba, na ntwala ya Agrippa, “Mu me kolamaka ve na vision ya Mazulu.” Yandi vwandaka ya kukangama na yawu. Ya vwandaka kima ya kieleka, kima yina yandi zabaka, kima yina muntu ve lendaka katula na yandi.

⁵² Ntangu yayi, bubu yayi, kana beto ke na kivuvu kaka na malongi, to mutindu ya masini ya—ya ndongosolo samu na kutendula Biblia, na yina beto kele kaka na yawu na dibanza ya yintu. Kasi muntu ve kele na muswa na manima ya chaire yayi, samu na kulonga Nsangu ya mbote, kukondwa yandi kutana na mbunzu na mbunzu na Yawu.

⁵³ Mutindu Moise, na manima ya ntoto ya kuyuma, ata ti yandi longokaka mbote, nionso yina salamaka; boma ya yandi mpe basouci katukaka samu ti yandi telemaka na Nzambi na ntoto ya busantu, ti muntu ve zolaka katula yawu na yandi.

⁵⁴ Mpe bakala nyonso to kento yina kele na nzingulu na Nzambi, me kutana na Dikunzi ya Tiya ya mutindu mosi na zulu ya kisika ya santu ya ntima ya beno. “Ya kele ve na muntu ya théologie, mpeve ya yimbi ve, kima mosi ve” Paul tubaka, “kima ve na ntangu yayi, kima ve na ntangu ke kwisa, lufwa, kimbevo, kiadi, lenda kabula beto na zola ya Nzambi, yina kele na kati ya Klisto Yesu.” Ya kele kisika ya kukangama na yawu. Beno zaba ti kima mosi me salama. Ata ti science ke telama mpe ke tuba *yayi*, *yina*, to *yankaka*, beno kele ya kukangama. Beno mpe Nzambi me kuma mosi. Yandi kele na kati ya beno, mpe beno kele na kati ya Yandi. “Na kilumbu yina beno ke zaba ti Mu kele na kati

ya Tata, Tata na kati ya Munu; Munu na kati ya beno, mpe beno na kati ya Munu.” Beno kele ya kukangama na Yandi.

⁵⁵ Mpe Paul vwandaka na luzingu na kati-kati ya Klisto. Ya vwandaka luzingu ya kuswaswana kulutila yina yandi vwandaka na yawu. Yandi kuzwaka dibanza ya malongi; kasi ntangu yayi yandi me kuzwa luzingu yina kele na kati-kati ya Klisto, dikunzi mosi. Ata ti Agrippa lendaka tuba, “Nge, nge me kuma kilawu, Paul. Nge me zimbisa mabanza ya nge. Nge, nge me longukaka mingi.”

Yandi tubaka, “Mu kele kilawu ve.”

⁵⁶ Mpe na yina yandi kwendaka na Agrippa, na mutindu ti yandi tubaka, “Nge ke zola kaka kundimisa munu na kuvwanda Muklisto.”

⁵⁷ Yandi tubaka, “Mu ke zola ti nge vwanda, kasi kaka na nganda . . . mutindu mu kele, katula kaka miniololo yayi.”

⁵⁸ Ya ke sala ti beno sala bima, ntangu beno ke kuzwa luzingu yina kele na kati-kati ya Klisto mutindu Paul, na mumesanu beno zolaka sala ve. Ntangu yayi beno tala. Na mumesanu, muntu yina longokaka Masonuku nyonso mpe bima nyonso, na mumesanu yandi zolaka ve kulanda nzila yina yandi longokaka. Kasi ntangu yandi kumaka . . . mpe salaka Klisto Dikunzi ya yandi, Kisika ya yandi ya kutudila ntima, na yina ya vwandaka luzingu ya kuswaswana. Yandi salaka na mutindu ya kuswaswana. Yandi salaka mambu ya bulawu, na yina yandi longokaka na kusala. Mpe ya ke sala kima mutindu mosi.

⁵⁹ Kana dibuundu ke kwenda ntama na Conseil ya Mabuundu yina, mpe ke vutuka mpe ke sala Ndinga ya Nzambi kisika ya bawu ke tula ntima, kusala Ndinga ya Nzambi kisika ya bawu ke kukangama na yawu, yina ke sukisa diambu. Kasi bawu ke kangama na kisalu yina muntu me sala. Mpe yawu ke kubwa kaka. Mbote, Biblia ke tuba ti bawu ke sala yawu. Kasi ya ke vwanda na Kento ya makwela yina ba soolaka kubanda mbandukulu ya yinza, yina ke vwanda ya kukangama na kisika ya kukangama na yawu.

⁶⁰ Mu lenda mona Seko kubukana, kukota na ntangu, kubanda Eden. Mpe, na ntangu Yawu me salama, tala nsinga ya Menga, yina ke kwenda tii na Calvaire; mpe katuka na Calvaire, ke kangama na nsinga yayi, mpe ke kwenda tii na kisika ya kukangama na yawu, Yesu. Mpe kilumbu mosi ntangu Yandi ke kwiza samu na kulomba bantu ya Yandi, muntu nyonso yina kele ya kukangama na kisika yina ba ke tula ntima ke zanguka na Seko. Samu na yinki? Bawu vwandaka na Seko ntangu nyonso. Bawu zabaka bawu na ntwala na Seko. Bawu kele kitini ya Nzambi. Bawu vwandaka na kati ya dibanza ya Yandi na mbandukulu. Mpe ntangu ba ke benda nsinga yina ya nene, nsinga ya Menga, Kidimbu yina mu vwandaka tubila, ntangu ya ke mata na zulu ya ntoto, muntu nyonso yina ba tulaka

na kati ya Menga yango ba ke fidisa bawu mbala mosi dyaka na Seko. Kasi mutindu mosi kaka ya ke vwanda, kele kuvwanda ya kukangama na Dikunzi yina, Yesu Klisto. Yandi kele dikunzi! Kisalu ya muntu ve; kasi Nzambi vumbulaka Yandi na lufwa, mpe Yandi kele Dikunzi. Mpe beto zaba ti Yandi kele moyo, samu awa Yandi kele na beto na Ngolo ya mvumbukulu ya Yandi, kusala bima mutindu mosi Yandi salaka ntangu Yandi vwandaka awa na zulu ya ntoto.

⁶¹ Mu kele ya kukangama na Kisika ya kutudila ntima. Yina kele nsuka ya kuswana nyonso. Mu kele ya kukangama na yawu. Yina kele luzingu ya munu. Mu vwandaka nsumuki ntangu Klisto me vulusa munu. Mu me kutana na Kima mosi. Mpe kubanda Yina me kwisa na kati ya munu, ya me—ya me kuma luswaswanu. Mpe mu kele ya kukangama na yawu, nyonso yina munu kele kele ya kukangama kaka kuna. Na yina Nzambi ke kabula luzingu ya Yandi, mpe ke bika munu kuzinga na kati ya Yandi, mpe Yandi na kati ya munu, na yina beto kele ya kukangama. Munu . . .

⁶² Ya ke sala ve luswaswanu yina bantu yankaka zola kukwikila. Muntu yandi mosi, beno kele ya kukangama na Yawu. Yina kele kisika ya beno ya kutudila ntima. Yina kele . . . yina kele ndinga ya nsuka. Na yina kana Yandi kele Ndinga, na yina *Yayi* fwana vwanda ndinga ya nsuka. *Yayi* fwana sukisa dyambu. Nyonso yina *Yayi* ke tuba, Yawu kele nsinga ya mbwaki. Ya kele Klisto. Mpe kima nyonso ya kuswaswana na Yawu, mu zaba kima ve samu na yawu. Ya kele yina beto zola kuzaba, ya kele yina Ndinga *yayi* ke tuba; samu ti mu kele ya kukangama na Klisto, mpe Klisto kele Ndinga. Beno me bakula yawu ntangu *yayi*?

⁶³ Mpe kitini ya Ndinga ya Yandi yina ba me zenga samu na bubu *yayi*, Mpeve-Santu ya Yandi kele awa samu na kutalisa kitini yina ya Ndinga.

⁶⁴ Kaka mutindu ya vwandaka kuna na lubutuku ya Yandi. Esaie 9:6. Na kati ya Masonuku, bima nionso ba tubaka samu na Yandi, yawu salamaka. Kuna na Buku ya Luc, beto ke tuba ti ya kele . . . beto ke mona yawu kuna. Mpe Yandi vwandaka nsuka, Yandi vwandaka—Yandi vwandaka nsuka ya profesi, mpe, ya Yandi. Yandi lungisaka yawu, disolo, bankunga, bima nionso na Ngwisani ya Ntama, yina tubilaka Yandi, yawu salamaka kaka kuna. Yina me kuma kisika ya kutudila ntima. Yina me kuma kisika ya kukangama na yawu ya Ndinga ya Nzambi samu na nsungi yina.

⁶⁵ Mpe bantu ya kieleka yina me butuka mbala zole na nsungi *yayi*, yina me fuluka na Mpeve-Santu, kele kisika ya kukangama na yawu samu na Masonuku *yayi* yina fwana salama na bilumbu *yayi* ya nsuka. Bawu kele kisika ya kutudila ntima. Ya kele kisika ya kutudila ntima ya Nzambi, samu ti ya kele Ndinga ya Yandi; mpe Ndinga kele Klisto, kisika ya kukangama na yawu. Ya kele

ve na mutindu ya kukwenda ntama na yawu. Kima yina me simba beno.

⁶⁶ Mutindu mu tubaka, ya ke sala ti beno kusala bima yina beno lendaka ve kusala na mumesanu. Ya salaka ti Paul kusala bima yina yandi zolaka sala ve na mumesanu. Ya salaka ti Moïse kusala bima yina yandi zolaka sala ve na mumesanu. Ya ke sala ti bakala nionso mpe kento nionso kusala bima yina bawu lendaka ve kusala na mumesanu. Ya kele kima yina beno kele—kele na kati-kati ya yawu. Ya kele kima mosi, Ya kele kima yina ke lembikaka beno. Ya kele mutindu . . .

⁶⁷ Ya kele kizundu samu na maswa. Masuwa kele ya kukangama na kizundu, na ntangu ya kitembo. Mpe kana Klisto kele Dikunzi ya beno, beno me kangama na Yandi. Na ntangu ya mpassi, masuwa, kana beno bika yawu kuningana, ya ke mwangana na matadi. Kasi yina beno ke sala, beno ke losa kizundu. Kizundu ke kulumuka tii kuna ya ke kota na kati ya lufulu ya matadi. Mpe masuwa ke kangama na kizundu. Ya kele dikunzi samu na maswa.

⁶⁸ Mpe Muklisto yina me butuka mbala ya zole me kangama na Klisto, mpe Biblia kele kizundu. Ya kele kima yina beto kele ya kukangama na yawu. Bika ba-organisation, bika kima yankaka, bika science, bika milongi kutuba nyonso yina bawu zola. Ntangu nyonso Ndinga yayi ke tuba yawu mpe ke sila yawu, beto ke kangama na Yawu. Ya kele na kima ke bika ve beto kukatula na yawu. Ya kieleka. Muklisto ya kieleka yina me butuka mbala ya zole, bawu ke bikana na Ndinga yayi. Kana Yawu me tuba na kusala kima yayi, mpe mutindu ya kusala yawu, ya kele mutindu yina beto fwana sala yawu. Ata nyonso yina muntu yankaka ke tuba, Ya kele yina Nzambi tubaka. Beto kele ya kukangama na Yawu, luzingu yina kele kati-kati ya Klisto.

Klisto, dyaka, ya kele mutindu Mbwetete ya Nord.

⁶⁹ Beno zaba, yinza ke balukaka. Mpe bambwetete, kieleka, yina beno ke mona mutindu mbwetete ya nkokila, kele diaka mbwetete ya suka. Yinza ke baluka kaka na yawu. Kasi ya ke kwenda ntama na bambwetete yina, nionso kasi mbwetete ya nord. Ntangu yayi beno lenda ve kuyidika boussole ya beno landila mbwetete ya nkokila mpe kukwenda kisika mosi, samu ti na suka yina ke landa, yinki? Mbwetete ya nkokila ke talisa na beno weste, mpe na suka yina ke landa ya ke talisa beno este. Beno me mona, beno lenda sala yawu ve. Kasi beno lenda tula yawu na mbwetete ya nord, amen, mpe kukanga yawu kieleka na lweka yina. Beno ke basika.

⁷⁰ Mpe ya kele mutindu yina kele luzingu yina kele kati-kati ya Klisto. Ntangu beno me zimbana, Yandi kele Mbwetete ya beno ya Nord. Na yina, kana Yandi kele Mbwetete ya Nord, Mpeve-Santu kele boussole ya beno, mpe boussole ke lakisa kaka

Mbwetete ya Nord. Ya ke lakisa ve credo to denomination. Ya ke lakisa ve sensation, to nyonso yina ya kele. Ya ke vwanda ya kusungama na Mbwetete ya Nord. Yandi kele Mbwetete ya beno ya Nord. Ntangu beno me zimbana, beno fwana kwenda ntama na ba-denomination, mpe bima ya mutindu yina. Kasi boussole, Mpeve-Santu, ke lakisa beno mbala mosi na Ndinga, yina kele Klisto, mpe ke sungika beno mbote-mbote. Beno kangama na Yawu.

⁷¹ Yinki kana ya vwandaka ve na mbwetete ya nord, wapi mutindu muntu lendaka mona nzila ya yandi ya mubu ya lubungi? Yinki kana ya vwandaka ve na Mpeve-Santu samu na kutwadisa beno na Ndinga ya Nzambi, samu na kutalisa Yawu mpe kusiamisa Yawu, yinki beto lenda sala na ngunga yayi? Mpeve-Santu ke talisaka kaka na Ndinga. “Muntu ke zinga kaka na dimpa ve, kasi na Ndinga nionso.” Kitini ya Ndinga ve; kasi na Ndinga nionso, Yawu nionso. “Konso Ndinga yina me basika na yinwa ya Nzambi,” yawu yina muntu lenda zingila. Yandi kele Dikunzi ya beno na luzingu ya beno, Yandi kele diaka Mbwetete ya beno ya Nord.

⁷² Beno zaba, beto fwana vwanda na kima mosi, yankaka, samu na kusukisa kuswana.

⁷³ Beno zaba, na ntangu mosi mutindu ya mbote na mesa vwandaka na yina kento vwandaka tuba. Mu ke kwikila nkumbu ya yandi vwandaka Emily Post. Mu lendaka vwanda na yimbi samu na yawu. Mu banza ya kele kieleka, Emily Post. Mu ke tala ve kana Emily Post me tuba, “Beni baka mbele ya beno mpe beno kudia madesu na yawu,” yina vwandaka mutindu ya mbote. Samu na yinki? Yandi vwandaka dikunzi ya mutindu ya kudia na mesa. Ya kieleka. Kana yandi tubaka, “Beni kudia yawu na maboko ya beno,” beno ke kudia yawu na maboko ya beno. Samu na yinki? Yinsi yayi me sala yandi dikunzi, samu na mutindu ya kudia na mesa. Yinga, tata.

⁷⁴ Ya vwandaka na ntangu mosi na Allemagne ya vwandaka na dikunzi, mpe yina vwandaka Hitler. Yandi vwandaka dikunzi mosi. Mu ke kipe ve yina muntu yankaka tubaka, ntangu Hitler tubaka, “Beni sala yawu,” beno ke sala yawu. Beno ke sala mbote na kusala yawu. Yandi kele ndinga ya nsuka. Hitler vwandaka.

⁷⁵ Ya vwandaka na ntangu yina Rome kuzwaka dikunzi mosi, mpe yina vwandaka Mussolini, ntwadisi ya nkú. Bakala mosi kwisaka sosa yandi muniti mosi na ntwala, yandi bulaka yandi munduki na kati ya ditoma ya yandi mpe basisaka yandi na ngolo, yandi tubaka, “Mu tubaka ata fioti ve muniti mosi na ntwala, mu tubaka ti nge ke vwanda awa na ntangu yina.” Dikunzi mosi! Nionso yina yandi tubaka, bawu fwana kusala yawu. Ya fwana salama. Yandi tubaka ti yandi ke sala yinza ya

muvimba kubaluka na ndinga ya yandi. Ya ke baluka na nzila ya Ndinga ya Nzambi!

⁷⁶ Ya vwandaka na ntangu yina Egypte kuzwaka dikunzi mosi. Ya vwandaka Pharaon. Mu kwendaka na Égypte kilumbu mosi, kaka samu na kumona bisika yina. Mpe beno fwana kutimuna na mudindu ya ba-mètre sambanu samu na kumona bakiti ya kimfumu ba vwandaka na yawu, empereur ya Rome; ntangu mu vwandaka na Rome mpe kuna na Égypte.

⁷⁷ Beno me mona, yawu nionso me vutukaka na putulu ya masolo, samu yawu vwandaka mutindu ya yimbi ya dikunzi. Ya kieleka. Ya kele yimbi. Ya me kubwa. Ya vwandaka makunzi yina me salama na muntu. Mpe dikunzi nionso yina me salama na muntu mpe kisalu nionso yina me salama na muntu fwana kwenda na putulu. Ba fwana kwenda na putulu. Ya kele mutindu ya yimbi, na yina ya ke kubwa.

⁷⁸ Beno banza kaka na yinsi ya beto. Ntangu beto ke kota na mpasi, kana muntu mosi me sala kima mosi, mpe ba ke meka kufunda yawu awa mbala yankaka na mwa tribunal ya mbanza, tribunal ya pulusu, na yina ya ke landila, ke landila, mpe na nsuka ya ke kuma na Yinzo ya nene ya Lusambusu. Ntangu yayi, Yinzo ya nene ya Lusambusu kele dikunzi ya yinsi. Yina ke sukisa diambu. Ntangu yayi, na Canada, bankundi ya beto ya Canada lenda kwenda, na Canada, na Ntinu ya kento. Kasi na Etats-Unis, ya ke Yinzo ya nene ya Lusambusu. Yina kele dikunzi. Bantangu yankaka beto ke zolaka ve balukanu ya bawu, kasi beto fwana kuwa yawu kaka. Yinga, tata. Beto ke wisana na yawu ve, beto ke zolaka ve lukanu ya yawu ntangu yankaka, kasi ya kele dikunzi ya yinsi yayi. Yinsi kele ya kukangama na yawu. Ya kele nsuka ya kuswana nyonso. Ntangu Yinzo yina ya nene ya Lusambusu ke tuba, “Beno kele ya kubwa,” beno kele ya kubwa. Beto fwana kuzwa yawu; kana beto kele na yawu ve, beto kele na yinsi ve. Yinki kana beto vwandaka na kima ya mutindu yina ve? Ya kieleka. Bima nionso kele na dikunzi.

⁷⁹ Ya kele na dikunzi na nsaka ya nkwesoso. Ya kele arbitre. Ya kieleka. Mpe kana yandi me tuba, “Ya me simba,” ya kele mutindu yina. Mu ke tala ve yina beno ke tuba, yina mu ke banza, mutindu mu monaka yawu, mutindu beno monaka yawu. Yawu kele yina yandi tubaka. Yandi kele dikunzi mosi. Kana yandi me tuba, “Ya me simba,” beno fwana wisana na yawu, samu ya kele mutindu yina ba ke sonika yawu kuna, “Ya me simba.” Yinki kana ya vwandaka ve na arbitre, ntangu yayi nani zolaka vwanda ya kusungama? Mosi ke tuba, “ya me simba,” yankaka yina ke tuba, “ya simbaka ve; ya vwandaka ball, ya vwandaka . . .” Mbote, beno zolaka vwanda na poto-poto. Beno zolaka zaba ve yinki kusala.

⁸⁰ Ya fwana vwanda na kisika mosi ndinga ya muntu mosi kele ndinga ya nsuka. Amen. Mu me kuwa mbote mingi ntangu

yayi. Nkembo! Alleluia! Ya fwana vwanda na kima yina kele ya nsuka. Mu kele na kiese mingi samu na yawu. Oh, ntangu yayi, ya kele na muntu yina lenda tuba, “Ya kele disumu,” to, “Ya kele disumu ve.” Mu kele na kyese mingi samu na yawu. Mu ke na kiese samu na dikunzi mosi. Kuswana ve, ya ke na nsatu ya kuswana ve. Arbitre me tuba, “ya me simba,” ya kele mutindu yina; beno simba yawu na mabanza ya beno, “ya me simba,” mpe beno kwenda na ntwala. Ntangu Nzambi ke tuba kima mosi, ya kele mutindu yina! Ya ke na nsatu ya kuswana ve samu na yawu. Ya kele mutindu yina. Yandi me tuba mutindu yina. Yina kele Dikunzi ya Muklisto, ya kele mutindu yina kana yandi kele Muklisto. Nzambi tubaka, “Sala yawu mutindu yayi,” ya kele mutindu yina ya fwana salama. Kuswana ve, “Mbote,” beno tuba, “ya vwandaka . . .” Ya ke soba kima mosi ve. Nzambi tubaka mutindu yina, yina ke sukisa diambu! Yina kele Dikunzi ya kieleka samu na mukwikidi ya kieleka. Yinga.

⁸¹ Yinki kana ya vwandaka ve na kima ya mutindu yina, wapi kisika beto zolaka vwanda? Ba-Methodiste lendaka vwanda ya kusungama, Baptiste, Presbyterien, Luthérien, to yinki zolaka wanda ya kusungama? Beno me mona, beto fwana, ya kele samu na yina beno—beno ke kuzwa poto-poto. Mpe ya kele samu na yina. Ba me bika dikunzi yina, yawu yina ba me zimbana na kulandaka bambwetete ya yankaka.

⁸² Kasi ya kele na dikunzi mosi. Ya fwana vwanda na dikunzi. Ya fwana vwanda na dikunzi mosi. Mpe ya kele na dikunzi mosi. Yina kele Ndinga. Mpe yina bayankaka ke tuba, ya kele diambu ve. Yinga, tata.

⁸³ Ntangu yayi, kana beto vwandaka ve na arbitre na nsaka ya nkwes, bantu nionso lendaka benda bansuki ya mosi na yankaka, mpe kuswana mpe kunwana. Beno me mona? Ya kele samu na yina beto kele na nsatu ya dikunzi na Buklisto, samu na kusukisa kubenda yayi bansuki, mpe kuswana mpe kunwana. Beno me mona? Ndinga me tuba yawu, mpe yina me sukisa diambu. Beno bwela na Yawu ve to beno katula na Yawu ve. Beno bika Yawu kaka mutindu Yawu kele.

⁸⁴ Beno zaba, ya kele na dikunzi na kutambula, ya kele nsemo ya stop, kidimbu ya kutambula. Yinki ke salama kana na suka mosi ya ke sala ve? Oh, la la! Beno me kotaka ntete na mosi ya yawu? Mu ke na yawu. Na ntembe ve, munati ditoma nionso me kutanaka na yawu. Yinki ke salama kana nsemo yina ke na salaka ve? Na yina muntu nionso ke kuswana. Bawu ke tambula kuna, mpe mosi ke tuba, “Mu vwandaka awa ya ntete,” yankaka yina ke tuba, “Bika mu tuba na nge kima mosi, mu fwana kwenda na kisalu!” Oh, la la! Bakento yayi ke ningisa basaki ya bawu ya maboko, mpe babakala ke nwana na makofi, mpe beno ke zonzila poto-poto! Ya fwana vwanda na dikunzi, kima yina ke tuba, “Yayi kele kieleka,” mpe yawu yina. Ntangu nsemo yina ke tuba, “telama,” ya zola kutuba telama. Ntangu ya ke tuba,

“kwenda,” ya zola kutuba kwenda. Kana ya kele ve, beno kele na mpasi.

⁸⁵ Mpe ya kele mutindu yina ya kele na luzingu ya Buklisto. Ya kele na kisika ya kutelama, mpe ya kele na kisika ya kukwenda. Ndinga ya Nzambi kele Dikunzi yina kele Kieleka. Yina kele Klisto. Yinga, tata. Kana beno . . .

⁸⁶ Kana bidimbu ya kutambula ke sala ve, na yina beto ke vwanda na nkakalakani na nzila. Mpe mu banza yawu yina beto ke na yawu kuna na pentagone yayi ya nsambulu bubu yayi; nkakalakani na nzila, ya bakwikidi ya yinwa, bantu ya kukondwa lukwikilu, mpe bima nionso me kangama kintwadi. Beno ke vwanda kaka na nkakalakani na nzila. Samu na yinki? Bawu kele ve na dikunzi. Mosi ke tuba, “Mbote, beto kele. . . Beto kele dikunzi.” Yankaka yina ke tuba, “Beto kele dikunzi.”

⁸⁷ Nzambi kele Dikunzi. Yandi tubaka, “Bika ti dikunzi nionso, na nganda ya yina ya Munu, kuvwanda luvunu. Oh ya munu kele Kieleka!” Na yawu, ya kele na Dikunzi samu na Buklisto. Yina kele nsuka ya kuswana nionso. Biblia me tuba mutindu yina, yina ke sala Yawu ya kusungama. Yinga, tata. Bima nionso fwana vwanda na dikunzi.

⁸⁸ Ya kele kaka mutindu mabuundu bubu yayi, mingi ya mabuundu kele na dikunzi ya bawu. Mosi na mosi kele na mosi ya yandi, kima mosi mutindu na bilumbu ya bazuzi, muntu nyonso vwandaka sala mutindu yandi vwandaka banza ti ya kele kieleka. Kasi yina kele mbote ve. Beno me mona, yina kele ntangu Ndinga ya Nzambi mpe baprofete vwandaka zinga ve. Ndinga kele Dikunzi. Bawu vwandaka na dikunzi ya bawu mosi. Muntu nionso ke tuba ti bawu kele Kieleka mpe nzila, “Beto kele Kieleka mpe nzila.”

⁸⁹ Kasi Yesu tubaka ti Yandi vwandaka Kieleka mpe Nzila, “Kieleka, Nzila, mpe Nsemo.” Ya kieleka? Mbote, na yina, Yandi kele Ndinga, na yina Dikunzi kele. Mpe Makunzi ya denomination, kele na mfunu ve; ya kele yimbi, beno bika yawu.

⁹⁰ Ntangu yayi, muntu ke sala mutindu ya yandi mosi, kasi Nzambi kele na nzila samu na yandi kusala yawu. Beno me mona, ntangu Nzambi mpe Ndinga ya Yandi mpe baprofete ya Yandi vwandaka kondwa, muntu nyonso vwandaka sala kaka mutindu yandi zolaka sala.

⁹¹ Mpe yawu yina me salama na kilumbu yayi, mosi na mosi ke tuba, “Mu—mu kele mosi ya yayi.” Beno kele Muklisto? “Mu kele Presbytérien.” Beno kele Muklisto? Mu ke yufula beno. Mwana-kento mosi tubaka, “Mu zola beno bakula ti, mu ke yokaka buzi konso nkokila.” Muntu yankaka tubaka, na ndonga ya bisambu, mu yufulaka yandi kana yandi vwandaka Muklisto, yandi tubaka, “Mu kele Américain. Wapi mutindu beno ke sala!” Mutindu ya vwandaka na kima ya kusala na Yawu. Beno me

mona, bawu kele ya kukangama na yinsi. Yankaka yina kele ya kukangama na organisation, na ba-dogme.

⁹² Kasi *Muklisto* zola kutuba “mutindu Klisto.” Mpe mutindu mosi kaka beno lenda vwanda mutindu Klisto ya kele kuvwanda na Klisto Ndinga na kati ya beno. Yina kele kisika ya kutudila ntima. Yinga. Mu me mona yayi ntete mu balula ntima, mpe mu kele na kyese ti Nzambi me simba munu na ntwala dibuundu kusimba munu. Na yina mu zabaka ntangu munu . . .

⁹³ Longi mosi ya mbote ya Baptiste, Mpangi Naylor, yandi kele na Nkembo bubu yayi, yandi kwisaka, yandi tubaka na munu. Mpe, oh, ya kele na bantu mingi yina vwandaka zonza na munu ntangu mu—mu vwandaka meka na kumona Nzambi. Mulongi ya Adventiste du Septième jour vwanda zola ti mu kota na bawu, mpe nionso yina. Kasi mu monaka ti kana mu ke vwanda Muklisto, mu—mu lenda tuba ve, “Ntangu yayi mu kele Adventiste du Septième jour.” Ntangu yayi, ya kele nyonso ya mbote mingi. “Mu kele Baptiste.” Ya kele mbote mingi, beno me mona, kasi mu zolaka vwanda na kima mosi ya kieleka kulutula fioti yina. Mu—mu lendaka tula kivuvu ve, samu muntu nionso vwandaka yenga-yenga.

⁹⁴ Mu banzaka, “Kele na muntu mosi kisika mosi kuna, nge fwana vwanda na kima yina kele kieleka, kisika mosi kuna.”

⁹⁵ Na yina mu vwandaka na nsatu ya dikunzi, na yina mu kuzwaka mosi, Ndinga ya Nzambi. Na yina mu tangaka na Ndinga ti Yandi kele Ndinga, Santu Jean 1. “Mpe na zulu ya dikunzi yayi, Mu ke tunga Dibuuundu ya Munu.” Um-hum. Ya kieleka. Na yina mu bakaka Yandi na Ndinga ya Yandi. Apocalypse 22:19 me tuba, “Yina nionso ke katula Ndinga mosi na Yayi, to kubwela ndinga mosi na Yawu.” Yina kele dikunzi. Yina kele nsuka ya kuswana nionso. *Yayi* kele dikunzi. “Konso muntu yina ke katula kima mosi na Yawu, to kubwela kima mosi na Yawu,” Nzambi tubaka, “Mu ke katula kaka kitini ya yandi na Buku ya Luzingu,” na yina Yina ke vwanda dikunzi. Mpe Yesu tubaka ti, “Muntu ke zinga kaka na dimpa ve, kasi na Ndinga nionso.” Na yina mu zabaka ti “Ndinga nionso” zolaka vwanda. Yandi tubaka, “Musiku na zulu ya musiku, mpe nzila na zulu ya nzila.” Ya ke mutindu yina Yawu fwana kwisa, kaka mutindu Yawu me sonama.

⁹⁶ Na yina Yandi tubaka, “Kana beno zinga na kati ya Munu,” Yandi kele Ndinga, “Bandinga ya Munu ke zinga na kati ya beno, beno lenda lombamba yina beno zola.” Mu zabaka ti kana Buklisto vwandaka Ndinga ya Nzambi, mpe Yandi vwandaka Ndinga, mpe na kundimaka Ndinga, Ndinga zingaka na nzila ya Yandi, na yina mu zaba, “Kana beno zinga na kati ya Munu, mpe Ndinga ya Munu na kati ya beno, beno lombamba yina beno zola,” mpe kana beno kele na kati ya Ndinga mpe kitini ya Ndinga, beno ke lombamba kaka yina Ndinga ke tuba na beno na kulombamba. Ben

zaba ti kilumbu beno ke na kuzinga, na yina, mpe beno lomba landila yawu.

⁹⁷ Na yina, beto vutuka na dilongi, ya ke sala. . . Mu ke tuba ntangu yayi na mutindu ya munu mosi, kasi mu kele ya kukangama. Mu me kangama na Yesu Klisto, na Yandi, na nzila ya Ndinga ya Yandi. Yandi kele Dikunzi ya munu.

⁹⁸ Mu me monaka ti ba-denomination nionso yayi mpe bima yayi vwandaka na dikunzi ya bawu. Mosi na mosi, mosi na mosi, bawu kele na dikunzi ya bawu mosi.

⁹⁹ Catholique, na ntangu pape ke tuba kima mosi, yawu yina kaka. Yina kele dikunzi ya dibuundu ya Catholique. Mu ke kipe ve yina nganga-Nzambi ke tuba, yina évêque ke tuba, yina cardinal ke tuba; ntangu pape ke tuba yawu, yawu yina kaka. Yina kele dikunzi. Ya kele kieleka.

¹⁰⁰ Na dibuundu ya ba-Methodiste mpe ba-denomination mingi ya ba-Protestant, yina évêque me tuba, yina kele dikunzi. Yawu yina. Yina credo ke tuba, yina kele dikunzi.

¹⁰¹ Na ba-Pentecotiste, ya kele yina surveillant général ke tuba, kana beno lenda kuzwa muntu yayi samu na reveil, to ve. Yina kele dikunzi. Kana beno ke wisana ve na bandinga ya yandi, ba ke basisa beno na organisation. Beno me mona, ba ke talaka ve kieleka Ndinga. Beno me mona? Beno ke na makunzi yayi, mosi na mosi kele na dikunzi ya yandi mosi.

¹⁰² Kasi, beno zaba, mu ke tuba yayi ve samu na kuvwenza. Mu ke tuba yawu samu na kieleka. Mu ke na nsatu mutindu Paul, ntangu yandi tubaka, na Actes 20:24, “Ata mosi ya bima yayi ke ningisa munu ve.” “Mu me bakaka ve lukanu ya kuzaba kima mosi ve na kati ya beno; kasi Yesu Klisto, mpe Yandi yina ba komaka na kulunsi.” Makunzi yayi ke yangisa munu ve, ata ti ya kele pape, évêque, to surveillant général, to konseye, to systeme mosi, to nionso yina ya kele, ata kima mosi ve ya bima yayi ke ningisa munu. Mu ke kipe ve kana ba ke tuba, “Mbote, beto—beto kele ve ku- . . .” Yina ke sala ata luswaswanu ve. Mu me bakaka lukanu ya kuzaba kima mosi ve kasi Yesu Klisto, Ndinga ya Yandi me monisama na kati ya beto. Mu kele ya kukangama na Yawu. Yina kele kizundu ya munu. Mu kele ya kukangama na Yawu.

¹⁰³ “Kubanda ntangu mu. . .” Paul tubaka, “Kubanda ntangu mu kutanaka na Yandi, na nzila, mu balukaka. Mu kumaka. . . Yandi sungikaka munu.”

¹⁰⁴ Oh, wapi mutindu Yandi sungikaka munu! Wapi mutindu ya kusungika yina Yandi salaka na munu. Kasi kubanda ntangu Yandi sungikaka munu, mu me kangama na Yawu. Mu monaka Ndinga vwandaka Kieleka, bima nionso ya kuswaswana na Yawu vwandaka luvunu.

¹⁰⁵ Beno zaba yinki? Yandi vwandaka na lukanu mosi ntangu Yandi vulusaka munu. Yandi vwandaka na lukanu mosi ntangu Yandi vulusaka beno. Mpe mu ndimaka, na luzolo ya Yandi, samu na kusala luzolo ya Yandi. Kikuma Yandi salaka yawu, mu zaba ve samu na yinki Yandi salaka yawu.

¹⁰⁶ “Beno yika na Yawu ve to beno katula na Yawu ve!” Mutindu mu tubaka, Apocalypse 22:19 me tuba beno sala mutindu yina ve. Kana Yandi kele Dikunzi ya beto, ya lenda vwanda mutindu yankaka ve. Ya kele na mutindu ve samu na yawu na kuvwanda mutindu yankaka. Yandi fwana vwanda Dikunzi, Ndinga ya nsuka.

¹⁰⁷ Beno zaba, ya vwandaka na mafuku na kati ya disumu ntangu mu vulukaka. Yandi vwandaka na lukanu ntangu Yandi vulusaka munu. Mu ke vwandaka muntu ya ngitukulu na kati ya bampangi, ntangu mingi; yina ke kwikilaka na predestination, nkuna ya nioka, mbotika na Nkumbu ya Yesu Klisto, mpe bima nionso yankaka yina ke monana mutindu...mpe bavi-sion, mpe ngolo ya Klisto me vutuka, mpe ke fundisa ba organisation mpe bima. Mu ke muntu ya ngitukulu, kasi Yandi vwandaka na kikuma ya kuvulusa munu, lukanu ya kusala yawu. Yandi vulusaka munu ntangu ya vwandaka na mafuku ya bantu na disumu, kasi Yandi vulusaka munu samu na kikuma mosi. Ya vwandaka na bantu ya kulongoka, ya vwandaka na bantu ya mayele, ya vwandaka na ba-théologien, ya vwandaka na ba-évêque mpe badokotolo, mpe nionso yina, na kilanga, ntangu Yandi vulusaka munu, kasi Yandi vulusaka munu na kikuma mosi.

¹⁰⁸ Mpe mu ke mona ti Ndinga kele Dikunzi, mpe mu me kangama na Yawu, mpe mu me baka lukanu ti mu ke zaba kima yankaka ve kasi Yesu Klisto, mpe Yandi yina ba komaka na kulunsi. Yandi vwandaka na kikuma samu na yawu, mpe mu bakaka lukanu ya kusimba kikuma yina. Ata nyonso yina muntu yankaka ke tuba, mu ke zenga ve kimpangi na bawu to ke weza bawu ve, kasi mu zaba kisika mu kele ya kukangama. Yandi zolaka munu vwanda mutindu yayi. Yandi zolaka munu mutindu yayi. Mu me salama samu na lukanu mosi. Mu zolaka salama kaka na makuki yayi, mpe nionso yina, mpe na bima yayi nionso ke salaka munu muntu ya mpamba, na yina Yandi lendaka basisa yawu na munu, kutula Kima mosi na kati kuna; yina vwandaka Ndinga ya Yandi. Mpe mu bakaka lukanu ti mu ke zaba kima yankaka ve kasi Klisto.

¹⁰⁹ Lufwa ya Klisto vwandaka dikunzi. Yawu vwandaka dikunzi. Yawu vwandaka nsuka ya boma na bayina nionso vwandaka na boma ya lufwa. Lufwa ya yandi kele dikunzi, na ntangu yina.

¹¹⁰ Bantu ke na boma ya lufwa. Job vwandaka na boma ya lufwa. Kasi ntangu yandi monaka vision! Yandi zabaka ti bima nionso

vwandaka me kwenda; dibuta ya yandi, bana ya yandi—ya yandi. Ata mpe kento ya yandi yambulaka yandi, samu na nsunga ya—ya mikolobo ya—ya bamputa ya yandi; yandi vwandaka kuna na nganda ya yinzo ya yandi, na zulu ya mbombi, vwandaka kukalata bamputa ya—ya yandi. Mpe kento ya yandi tubaka, “Samu na yinki nge lenda singa Nzambi ve, mpe kufwa?”

Yandi tubaka, “Nge ke tuba mutindu kento ya bulawu.” Beno me mona?

¹¹¹ Na yawu ntangu Elihu tubaka na yandi . . . Mosi ya bilumbu yayi, mu zola tendula nkumbu yina samu na nge, Elihu, mpe mu ke tuba tí nge vwandaka Klisto.

¹¹² Ntangu yandi vwandaka na mutindu yayi, mpe bima nionso vwandaka me telemina yandi, na yina yandi monaka vision ya Muntu ya Kieleka. Yandi zolaka kuzwa Muntu Yina lendaka telama na kati-kati samu na yandi; tulaka maboko ya Yandi na zulu ya muntu ya masumu mpe Nzambi ya Santu, mpe kutelama na nzila. Mpe Nzambi bikaka yandi kumona Yawu, bamvula mafunda yiya ntama kuna. Yawu vwandaka dikunzi ya yandi. Yandi telemaka mpe kukiningisaka yandi mosi. Alleluia!

¹¹³ Ntangu muntu ke na boma ya kufwa, telama mpe kukiningisa nge mosi, tala na Ndinga mpe mona yinki vision ya Nzambi kele.

¹¹⁴ Yandi monaka vision yina, yandi tubaka, “Mu zaba ti Mukudi ya munu kele moyo, mpe na bilumbu ya nsuka Yandi ke telama na zulu ya ntoto yayi. Mpe mu ke kangama na yawu! Kana misobi me bebisa nzutu yayi, kasi na nzutu ya munu mu ke mona Nzambi: mu ke mona Yandi munu mosi. Mu me kangama na yawu,” yandi tubaka. Yandi monaka yawu. Ya vwandaka nsilulu ya Nzambi.

¹¹⁵ Yandi talaka na nzila ya misiku ya yinza. Mutindu mu vwandaka tuba na beno na kulandila musiku ya yinza, kulandila ya Ndinga, kulandila ya kusala ya Nzambi, nyonso kele na kulandila. Yandi yufulaka, na Job 14. Yandi tubaka, “Ya kele na kivuvu na yinti, kana ya kufwa; felele, kana ya kufwa; mpe nyonso yina. Kasi,” yandi tubaka, “muntu ke lalaka, mpe yandi ke fwa, yandi ke zimbisa ngolo ya yandi. Bana ya yandi ya babakala ke kwisa pesa yandi lukumu, yandi ke zaba yawu ve. Oh,” na yina yandi tubaka, “kana Nge ke bumba munu na kati ya ntoni, bumba munu mpe bumba munu na kisika ya kinsweki, tii kuna nganzi ya Nge ke luta!” Yandi vwandaka na boma ya lufwa.

¹¹⁶ Kasi ntangu yandi monaka na ntwala, mutindu profete, yandi monaka mvumbukulu ya Yesu Klisto, yandi bokaka, “Mukudi ya Munu kele moyo!” Beno tala, yandi bokilaka Yandi, “Mukudi.” Beno tala. “Mu zaba ti Mukudi ya munu kele moyo, mpe na bilumbu ya nsuka Yandi ke telama na zulu ya ntoto; kana na manima misobi ya mpusu ya munu me bebisa nzutu yayi, kasi

na nzutu ya munu mu ke mona Nzambi.” Nzambi mpe Mukudi vwandaka kima mosi, Nzambi mpe muntu kumaka mosi. “Mu ke mona Nzambi; Yina mu ke mona munu mosi, meso ya munu ke tala, mpe muntu yankaka ve.” Amen.

¹¹⁷ Muntu yankaka ve kasi Mukudi yina, Nzambi, Yandi yina meso ya munu ke tala. Yandi kele Dikunzi. Yandi kele Dikunzi. Yandi ke katula boma nionso ya lufwa. Yandi ke katula boma nionso.

¹¹⁸ Na ba-Hebreux, na kapu 2, na nzila ya 14 mpe na nzila ya 15, beno tala mbote. Yandi bakaka nzutu ya muntu, samu na kufwa mutindu muntu, samu na bantu nionso. Yandi bakaka nzutu ya muntu. Mukudi yayi kulumukaka mpe kumaka muntu, na yina Yandi lendaka kufwa, Muntu mosi, samu na bantu nionso. Oh, wapi mutindu Yandi salaka yawu? Samu na yinki Nzambi kumaka muntu? Samu na kufuta kitumbu ya muntu.

¹¹⁹ Kasi, na suka ya Paki, Yandi basikaka na bafungula ya lufwa, difelo, na ntoni. Amen. Nzambi, Yina lendaka kufwa na kulunsi, mpe bantoni lendaka simba Yandi ve; kima mosi ve, difelo lendaka simba Yandi ve. Kima mosi ve lendaka simba Yandi. Yandi vumbukaka. Yandi vwandaka na bafungula. Yandi vumbukaka, Munungi, samu Yandi nungaka nionso lufwa, difelo, ntoni. Ntangu Yandi vwandaka na zulu ya ntoto, Yandi nungaka kimbevo. Yandi nungaka nionso. Yandi nungaka bangindu. Yandi nungaka bima nionso yina ba lendaka nunga. Mpe me basika na lufwa, difelo, mpe ntoni, bafungula vwandaka ningana na luketo ya Yandi; mpe me zanguka na Zulu, mpe pesaka makabu na bantu, mpe vutukaka na Kilumbu ya Pentecote mpe pesaka yawu na Pierre, na Dibundu. Amen. Yandi kele Dikunzi ya beto. Boma nionso ya lufwa... Samu Yandi ke zinga, beto mpe ke zinga.

¹²⁰ Romains 8:1, “Na yina na kuvwandaka ya kunungisama na nzila ya lukwikilu, beto kele na ngemba na Nzambi na nzila ya Mfumu ya beto Yesu Klisto.” Beto ke mona ti, mu ke kwikila ti ya kele ba-Romain 5, beto tala. Mpe—mpe Yandi kele kunungisama ya beto. Nzambi vumbulaka Yandi na kilumbu ya tatu, samu na kunungisa lukwikilu ya beto, ti beto ke kwikila yawu. Mpe Yandi vumbulaka Yandi, samu na kunungisa lukwikilu ya beto. Yinki Yandi salaka na ntangu yina? Yandi fidisaka Yandi, Munungisi, samu ti lukwikilu ya beto ke kwikila yawu. Mpeve-Santu, Klisto, ke kota kuna na kati, samu na kunungisama ya beto, samu beto me vumbuka na lufwa tii na Luzingu. Mpe ntangu yayi beto kele bana-babakala mpe bana-bakento ya Nzambi, yina me vwanda na bisika ya Mazulu kati na Klisto Yesu, me nungisa beto na nzila ya mvumbukulu ya Yandi.

¹²¹ Yina pesaka beto kunungisama, na kuzaba, na—na lufutu ya mpulusu ya beto na kati ya beto ntangu yayi, Luzingu nionso ya Klisto ke pela na kati ya beto. Mpe wapi mutindu beto lenda

manga Ndinga? Na yina, Yandi kele Ndinga yina ke pesaka beto. . . kivuvu yayi. Mpeve-Santu kele kuna. Yinki Yawu kele? Ya kele dyaka Mbwetete yina ya Nord, Klisto kele Mbwetete yina ya Nord. Mpe Mpeve-Santu kele kunungisama yina ke lakisa mukwikidi mbala mosi na Mbwetete ya Nord. Kieleka.

¹²² Mpeve-Santu ke lakisaka ntangu nyonso Ndinga. Kana Yawu lakisa na credo to na denomination, ya kele ve Mpeve-Santu. Yandi lendaka sala yawu ve, na kulakisaka kima yankaka na kisika ya Ndinga ya Yandi, na yina Yandi kufwaka samu na kusiamisa Ndinga yina mpe kusala Ndinga yina kieleka. Amen. Yandi kufwaka samu Yandi lendaka kwisa, Yandi mosi, na kati ya Ndinga yina. Yandi ke kukindisaka Luzingu yina ke sala ti Ndinga kuzinga diaka. Yina vwandaka lukanu ya Yandi ya lufwa, ti Yandi lendaka talisama Yandi mosi na nzila ya Dibuundu ya Yandi, mpe kusala ti Ndinga nionso, na kati ya bansungi nionso, kusala kaka kieleka mutindu Yawu zolaka kusala.

¹²³ Yandi kele dynamiki ya mekaniki. Mekaniki ya Dibuundu, yinki ya kele? Bantumwa, baprofete, milongi, mpe nionso yina. Mpe Yandi kele dynamiki yina ke salaka yawu. Mpe ya ke salaka na nzila ya mwa dynamiki yina ba ke bokilaka mutindu. . . Yandi, Yandi kele Tiya yina ke pelisaka gaz. Yandi kele Tiya yina kele na kati ya kivinga ya tiya, ti ntangu gaz, Ndinga, ba me kotisa yawu kuna na kivinga ya tiya, Yandi kele Yandi yina tulaka tiya ya yandi. Yandi kele Yandi yina ke pelisaka yawu. Yandi kele ngolo ya mvumbukulu. Yandi kele Nzambi. Yandi, Yandi kele Tiya, yawu yina Yandi kele.

¹²⁴ “Ata muntu lenda kumanga ve,” tubaka Timothée ya Ntete kapu 3:16, “ya nene kele mansweki ya busantu ya beto; samu ti Nzambi monisamaka na nzutu, monikaka na bawanzio, zangukaka na Nkembo.” Yandi vwandaka Nzambi, yandi kwisaka samu na kubaka kisika ya bansumuki. Yinga, tata. Mpe ntangu Yandi, Nzambi, vumbulaka Yandi na lufwa—na kilumbu ya tatu, ya vwandaka samu na kunungisama ya beto. Na yina, me zanguka na diboko ya kibakala ya Kimfumu kuna na Zulu, Yandi kele Musambidi, samu na kulombila samu na beto. . . samu kulemba ya beto, mutindu beto ke funguna yawu na Yandi, mpe kufwa na beto mosi; kuvutula Ndinga ya Yandi na kati ya beto, nsilulu. Mpe lukwikilu ya beto ke sala ti Ndinga kuzinga, samu Klisto kele na kati ya beto, mukindisi ya Ndinga.

¹²⁵ Mu zola ti dibuundu kumona yawu, kuswana nionso mpe kubendana nionso ke kumana! Yina ke vwanda Yinzo ya nene ya Lusambusu. Yina kele Mbwetete ya Nord. Alleluia! Yina kele nsuka ya kuswana nionso. Yina kele nsuka ya bakyuvu nionso. Yina kele nsuka ya bima nionso. “Nzambi tubaka mutindu yina,” yina ke Dikunzi. Beno kangama na Yawu. Paul tubaka, “Ya kele ve na kima mosi na ntangu yayi, kima mosi ve ke kwisa na ntwala, lufwa, kimbevo, kinkonga, lufwa, kima ve lenda

kabula beto na Yawu.” Beto kele ya kukangama na Dikunzi. Yandi tubaka, “Samu na munu na kuzinga kele—kele Klisto, mpe kufwa kele ndandu.” Kima yankaka ve ke simba kasi Yawu yina. Yina kele Dikunzi.

¹²⁶ Yandi kele Dikunzi ya beto samu beto kele na kivuvu ya mvumbukulu, samu Yandi me vumbuka na kati ya beto. Wapi mutindu beto me zaba? Yandi ke zinga. Yandi ke sala kieleka awa yina Yandi salaka ntangu Yandi vwandaka awa na zulu ya ntoto. Yandi kele Dikunzi ya Tiya mosi, beto kele na foto kuna. Yandi kele yina kele na kati ya Dibuundu. Yandi kele awa bubu yayi, mpe na kati ya nzutu yayi Yandi ke lungisa mpe ke sala kieleka mutindu Yandi salaka kuna.

¹²⁷ Kana ba me tula luzingu ya pasthèque na kati ya citrouille, ya ke basisa diaka ve citrouille yankaka; ya lendaka ve kusala yawu, samu ya ke vwanda pasthèque, samu luzingu yina kele na kati ya yawu kele pasthèque. “Mpe kana ya Munu. . . Beno ke zinga na kati ya Munu mpe Ndinga ya Munu kele na kati ya beno, beno lomba yina beno zola!” Beno ke vwanda na ba-pasthèque. Amen. Dikunzi, mu zaba ti ya kele Kieleka. Mu me kangaka moyo ya munu na kati ya yawu, mpe mu zaba ti ya kele Kieleka. Ndinga ya Nzambi, Yandi kele Dikunzi ya beto.

¹²⁸ Ba-Thessalonicien ya Zole, kapu 2, beto ke tanga yawu. “Ba ke zanguka kintwadi na bankundi ya beto ya luzolo, samu na kukutana na Yandi na mipepe.” Oh, wapi mutindu ntima ya munu ke pela samu na konso Ndinga na kati ya Buku ya Yandi, “Amen.” Nzambi tubaka, “Beto ke zanguka kintwadi na mazulu, samu na kukutana na bankundi ya beto ya luzolo.” “Amen,” Ndinga tubaka na kati ya ntima ya munu, samu Ndinga kele na kati kuna.

¹²⁹ “Mu me bumba Ndinga ya Nge na kati ya ntima ya munu, Mfumu, ti mu ke sumuka ve na ntwala ya Nge. Mu ke kanga yawu na misapi ya munu, na zulu ya makunzi ya mbeto ya munu. Nge ke vwandaka ntangu nionso na ntwala ya munu. Mu ke ningana ve.”

¹³⁰ “Yinga, ata ti mu tambula na kiwanda ya kivudi ya lufwa, mu ke vwanda na boma ya dyabulu ve, samu ti Nge kele Dikunzi ya munu. Mu ke kota kuna, mpe Nge ke basisa munu. Ntangu masuwa ya munu ke kota na kati ya bamaza ya mudindu, Nge ke. . . Nge kele kizundu ya munu. Amen. Nge kele na manima ya vwale kuna. Nge kele Yandi Yina ke twadisaka munu na kati ya kitembo. Nge kele Yandi yina ke vwanda Kuna, kizundu ya munu na Nkembo, ntangu mu ke kulumuka na bivudi ya kiwanda, bivudi ya lufwa.” Ntangu mu ke kuma na Jourdain, ntangu mu ke zabuka na simu yina, Yandi ke Dikunzi ya munu. Mu me kangama na Yandi yina me vumbuka na lufwa yina kele na simu yina, Yandi ke basisa munu na kati ya bamaza ya bigonsa. “Mu ke vwanda na boma ve, samu Nge kele na munu.” Amen. Ti

bitembo kudasuka, luzingu, lufwa, nyonso yina ya kele; kima ve ke kabula munu. Mu kele ya kukangama na Dikunzi yina.

¹³¹ Dikunzi yina kele ya kusimba mbote. Ya ke simba na kati ya wvale. Ya kele ya kukangama. Yawu kele ya kukangama na Nzambi kuna. Yawu kele ya kukangama na kati ya ntima ya munu. Mpeve-Santu kele yina ke yangidika munu na nsilulu yina: “MU KELE!” Ve, “Mu ke vwanda,” “Mu wandaka,” “Mu ke vwanda kilumbu mosi.” “Mu kele Mvumbukulu mpe Luzingu,” me tuba Nzambi. “Yandi yina ke kwikila na Munu, ata ti yandi me kufwa, kasi yandi ke zinga. Mpe yandi yina ke zinga mpe ke kwikila na Munu, yandi ke kufwa ata fioti ve.”

¹³² Bika ti lufwa kusala nyonso yina yawu zola, ata mbala mosi ve ti yawu ke yangisa munu, samu mu me ndima yawu, mu me ndima ti ata mpe na kimbevo yina lenda baka munu, to disasi mosi me basika na munduki, kilumbu mosi, samu na kubaka munu, mu zaba ve yinki ya ke vwanda, wapi luswaswanu ya ke sala na munu? “Samu Klisto kele luzingu ya munu, mpe kufwa kele ndandu.” Oh, la la! Samu, mu me baka lukanu ti mu zaba Yandi ke telama kuna na simu ya nzadi ya lufwa, kisika Yandi ke nata munu na Mvwandulu ya Yandi kilumbu mosi. Ya kunungisama na nzila ya ludedomo ya Yandi, ti mu me ndima na lufwa ya Yandi na zulu ya kulunsi, Nzambi yina me kuma nsuni na kati-kati ya beto; dyaka nsuni na kati ya beto, kasi dyaka Mpeve na nzutu ya beto. Amen.

¹³³ Yandi kele Dikunzi ya munu. Yandi kele nyonso ya munu. Konso kima yina kele na nganda ya yawu, mu ke nata kima mosi ve na maboko ya munu. Mu zaba kima yankaka ve na nganda ya Klisto, mpe Yandi yina ba komaka na kulunsi; mu zola kuwa kima yankaka ve kasi Klisto, mpe Yandi yina ba komaka na kulunsi. Ntima ya munu ke tuba “amen” na konso nsilulu ya Yandi. Ya kele samu na yina mu zaba ti Mpeve-Santu ya Yandi kele boussole, Yawu ke nataka munu na Ndinga.

¹³⁴ Ata mbala mosi ve ti mosi ya ba-vision yina tubaka kima mosi na munu kasi yina vwandaka kieleka kuna na kati ya Ndinga. Oh, mu ke na kivuvu ya munu kuna, mpangi-bakala. Na nkokila yina ntangu Yandi tubaka na munu samu na yawu, mu ke talaka ntangu nyonso ba-vision yina. Mpe mu ke benda bukebi ya beno, vision yayi me tubaka ntete kima yina me swaswana na Ndinga? Ata mbala mosi ve ti ya me kondwaka. Samu na yinki? Ya kele Nzambi. Yina kele kisika ya munu ya kukangama.

¹³⁵ Mpe mu zaba, na suka mosi, na vision, mu monaka bankundi ya munu ya luzolo kuna na simu yina ya nzadi. Ya kele kuna. Mu ke kwenda na Yinsi ya nsilulu. Mu fwana kwenda kuna kilumbu mosi. Yinga, ya kieleka.

¹³⁶ Yandi kele Dikunzi ya munu. Yandi kele Mwini ya munu. Yandi kele Luzingu ya munu. Yandi kele kisika ya munu ya kukangama, Mbwetete ya munu ya Nord. Yandi kele nyonso

yina mu lendaka banza na kuvwanda, Yandi kele yawu samu na munu. Yandi kele Luzingu ya munu.

¹³⁷ Ba-denomination, samu na munu...Mu ke lwadisa ve bansatu ya beno; mu zola sala mutindu yina ve. Kasi Ndinga kele mutindu mbele ya meno zole, Yawu lenda ve kubula kukondwa kuzenga, beno me mona, mingi-mingi ntangu Yawu ke na kuzenga na kati ya mudidi. Beno tala, ba-denomination kele mutindu bambwetete yankaka, yawu ke tambula ntangu yinza ke baluka. Ya kele kieleka. Konso mutindu yinza ke kwenda, bawu ke bika bakento ya bawu kuzenga bansuki ya bawu, kulwata bakupe, mpe nionso yankaka, ya ke tambulaka na Hollywood mpe bima nionso yankaka. Kasi, oh, mpangi-bakala, *Yina* kele kaka Kieleka, Ndinga ya Nzambi ya moyo yina ke ninganaka ve! Ya kele Dikunzi ya munu. Yina Yawu ke tuba kele Kieleka. Bika ti denomination kukwenda kisika yina bawu zola. Kana yawu zola kuvweza Nkumbu ya Yesu Klisto, na kisalu, yina me tala bawu. Kasi, samu na munu, “Ya kele ve na Nkumbu yankaka na nsi ya Mazulu yina pesamaka na bantu, na yawu beno fwana kuzwa mpulusu.” Samu na munu, yina kele lufulu ya Ndinga, ya kele kisika yina ditadi ya nsongi kele. Mu ke zola ve kukwenda na denomination mosi.

¹³⁸ Mu kele na Boussole ya munu awa na kati ya munu, Mpeve-Santu, ke lakisa munu kaka mbala mosi na Dikunzi. “Samu ti mazulu na ntoto ke luta, kasi Bandinga ya Munu ke luta ata fioti ve.” Mpe mu me bumba Yawu na kati ya ntima ya munu, mpe Mpeve-Santu talisaka munu kaka na Yawu. Mu me baka lukanu ya kuzaba kima yankaka ve. Yina kele Dikunzi ya munu. Bika yawu vwanda mutindu yina. Yina kele mutindu mu zola yawu. Oh, la la! Ntangu yayi, mpangi-bakala, mpangi-kento, beno sala Yandi Dikunzi ya beno. Yinga, tata.

¹³⁹ Na ntangu ya mpasi mu kuzwaka awa ntama mingi ve, mu zimbisaka kento ya munu, bana ya munu, bima nyonso. Muntu mosi tubaka na munu, yandi tubaka, “Nge ke kebaka nsambululu ya nge?”

¹⁴⁰ Mu tubaka, “Ve, Yawu ke kebaka munu.” Beno me mona? Beno me mona, mu vwandaka na Dikunzi, samu na kuzaba ti kilumbu mosi mu ke mona bawu diaka. Amen. Mu lendaka sala yawu ve kana mu vwandaka ve na Dikunzi yina. Ya salaka luswaswanu na kati ya munu, kisika mu vwandaka ya kukangama, samu mu zabaka ti mu ke zola kumona bawu diaka.

¹⁴¹ Ntangu yayi, na lemvo, mu me kangama na Yandi Yina tubaka, “MU KELE,” ve “Mu vwandaka.” “MU KELE,” ntangu nionso, ntangu nionso awa, nionso-, yina zaba nionso, nionso-, yina kele na ngolo nionso, ya seko, ti Yandi kele ve “Mu vwandaka.” “MU KELE,” Yandi kele ntangu nionso mvumbukulu. Yandi kele ntangu nionso Mbwetete ya Nord. Yandi kele ntangu nionso bima nyonso, samu na munu.

¹⁴² Moise vwandaka na dikunzi. Na ntangu yandi kutanaka na mulaka ya tiya, yina vwandaka dikunzi ya mazulu. Na ntangu Josué—ntangu Josué. . .

¹⁴³ Oh, beno zaba, ntangu yankaka ntangu beno ke baka dikunzi mosi, dikunzi ke twadisa beno na diambu ya ngitukulu. Ya kieleka. Yinga. Diambu ya ngitukulu kele kima mosi ya kieleka, kasi ba lendaka ve kutendula yawu. Yawu kele diambu ya ngitukulu.

¹⁴⁴ Ntangu Josué telemaka kuna, mpe yandi monaka ti yandi vwandaka na nsatu! Nzambi pesaka yandi kisalu ya kukwenda kuna mpe kubaka yinsi yina, kununga bantu nionso yayi, mpe—mpe kutula Israel na yinsi. Mpe kilumbu mosi, basoda kumaka na mubulu, mpe bawu vwandaka kuna na yinsi. Mpe—mpe kima ya ntete beno zaba, yandi zabaka ti yandi me nunga bawu, ntangu nionso yandi vwandaka panza bawu. Na yina, ntangu yandi salaka mutindu yina, mwini dindaka. Mpe Josué vwandaka ya kukangama na Dikunzi yina, Ndinga ya Nzambi, Mvangi. Yandi vwandaka ya kukangama na kisalu yina yandi zolaka sala. Amen.

¹⁴⁵ Ntangu yankaka ya kele ve kima yina ke sepelisa na kusala yawu; beno fwana lwadisa bansatu, kuzenga mpe kupasula. Kasi ya kele dikunzi.

¹⁴⁶ Yandi vwandaka na nsatu. Yandi tubaka, “Mwini, vwanda swi, kuna! Ngonda, kuningana ve kuna!” Mpe, na bangunga makumi zole na yiya, yandi telemaka kuna. Oh, beno ke tuba samu na diambu ya ngitukulu! Kasi yandi vwandaka ya kukangama na dikunzi, na lutumu. Yinga, kieleka, Nzambi pesaka yandi lutumu.

Jean vwandaka na kivuvu ti yandi lendaka mona Yembe na ntangu Yandi ke kwisa na zulu ya Yandi.

¹⁴⁷ Ntangu mu monaka Dikunzi ya Tiya yina, mutindu Paul na nzila ya Damas, mu zabaka ti yina vwandaka Dikunzi ya Nzambi, reveil yina ke kombula bayinsi ke kwisa. Mu zabaka ti Yawu ke kwisa na ntwala ya Nkwizulu ya zole ya Yesu Klisto, mpe mu ke kwikila yawu diaka bubu yayi. Yawu kele Dikunzi ya munu, ti ya vwandaka diambu ya ngitukulu. Ya kieleka, ya vwandaka diambu ya ngitukulu, ti Dikunzi ya Tiya kutelema kuna na zulu. Mpe bazulunale mpe bima nionso vwandaka baka foto ya Yawu.

¹⁴⁸ Yawu vwandaka diambu ya ngitukulu, kilumbu yina, na kilumbu ya 15 ya Ngonda ya tatu, to na kilumbu ya 15 ya Ngonda ya tanu, mu banza. . .ve, na kilumbu ya 15 ya Ngonda ya tatu, na mvula yayi me luta. Na yina, bangonda tatu to yiya na ntwala, *Yinki Ntangu Yayi, Batata?*, mu tubaka ti beto ke kwenda kuna, “Mpe Bawanzio sambwadi ke kutana, mpe ke vutuka, mpe Buku ya Bidimbu Sambwadi ke zibuka.” Mpe mu vwandaka kuna na Mpangi Fred Sothmann, yina me tuba

“amen” kuna, ya kutelama pene-pene ya yandi, samu na yinki, mu tubaka na bawu, “Ya ke vwanda na makelele yina ke ningisa yinsi.” Mpe mu tubaka, “Ya ke vwanda kuna. Ya kele MUTINDU ME TUBA MFUMU.” Ya ke na ba-bande, ba-bande, ba-bande, kubanda na Phoenix bisika nionso. “Ya kele MUTINDU ME TUBA MFUMU.”

¹⁴⁹ Kilumbu mosi, mu vwandaka ya kutelama kuna, mu vwandaka katula manama, to mwa bansendele na makulu ya munu, mutindu mu vwandaka kuna; na yina Bawanzio sambwadi yayi kulumukaka na zulu mpe ningisaka kisika yayi, tii, matadi, yina vwandaka na bakilo makumi zole na tatu to makumi zole na tanu, kulumukaka na kubalukaka na lweka ya mongo. Kuna vwandaka Bawanzio sambwadi, ba pesaka munu lutumu na kuvutuka mpe kulonga Bansangu yayi, mpe tubaka, “Mosi na mosi” bawu ke “kutana mpe ke tuba na munu yina salamaka.” Mpe yawu salamaka mutindu yina. Mpe ntangu bawu mataka na Zulu, mutindu *yina*, bawu mataka na mipepe na bitamina makumi tatu kuna na zulu; mpe, na kilumbu mosi, bawu kangaka Yawu foto, science salaka yawu, mpe yawu kwendaka na yinza ya muvimba. Ya kele diambu ya ngitukulu, kasi ya vwandaka Dikunzi. Ya kangaka munu na ngolo mingi na kati ya Yesu Klisto, na kufikaka luzingu ya munu na kati ya Yandi. Mu zaba ti ya ke monana ya ngitukulu. Ya ke vwandaka ntangu nionso mutindu yina.

¹⁵⁰ Ya vwandaka diambu ya ngitukulu samu na Paul, samu na kukutana na Yesu na nzila ya Damas. Ya kele diambu ya ngitukulu ntangu Nzambi ke soba ntima ya ndombe, ya nsumuki mpe ke kumisa yawu mpembe na Menga ya Yandi Mosi. Ya kele diambu ya ngitukulu. Ya kieleka. Beno ke kwikilaka na mambu ya ngitukulu? Mpe diambu yayi ya ngitukulu, kana ya kele landila Ndinga ya Nzambi, ya lendaka vwanda dikunzi ya beno. Kubalula ntima ya Paul vwandaka diambu ya ngitukulu, mpe yandi kumaka dikunzi ya yandi.

¹⁵¹ Beno bambuka moyo awa, na mwa ntangu fioti me luta, mu vwandaka ya kuvwanda na pharmacien mosi ya ntama, mpe beto vwanda zonza na mwa kisika mosi. Yandi tubaka, “Mpangi Branham, mu zola yufula nge kima mosi.” Mpe yandi vwandaka Baptiste, yandi mosi. Yandi tubaka, “Nge ke kwikilaka na ba-parasite?”

Mu tubaka, “Kieleka. Kieleka.”

¹⁵² Yandi tubaka, “Mu ke tuba yayi na muntu yankaka ve kasi nge,” yandi tubaka, “kasi mu—mu zaba ti nge ke kwikila yayi.”

¹⁵³ Yandi tubaka, “Na ntangu ya munu ya mpasi,” yandi tubaka, “bantu zolaka vwanda na mukanda, ya comte, samu na kubaka bankisi samu na bambevo.” Mpe yandi tubaka, “Kilumbu mosi, mu vwandaka ya kuvwanda awa na pharmacie.” Yandi tubaka, “Mwana ya munu ya bakala vwandaka sadisa ba-client.”

Mpe yandi tubaka, “Mu monaka kento mosi ke kwisa.” Yandi tubaka, “Yandi vwandaka . . . Beno lendaka mona ti yandi ke zola kuvwanda mama.” Mpe yandi tubaka, “Mwa mama yango lendaka telama na mpasi. Mpe bakala ya yandi vwandaka me lwata na bumptu, bawu nyonso zole. Mpe yandi vwandaka me yekama na lweka ya comptoir. Mpe yandi kwendaka kuna mpe yufulaka mwana ya munu ya bakala, yandi tubaka, ‘Mu ke na mukanda ya dokotolo awa.’ Yandi tubaka, ‘Nge zola kundima yawu samu na munu mpe kubika munu nata kento ya munu na yinzo?’ Yandi tubaka, ‘Mu mekaka na kubika yandi kutelama na ndonga yina. Beno tala kaka na bala-bala kuna,’ yandi tubaka, ‘ya ke vwanda bangunga yiya to tanu.’ Mpe yandi tubaka, ‘Yandi lenda telema ve ntangu yayi, nge lenda mona.’”

¹⁵⁴ Mpe ntwenya yango tubaka, “Tata, mu—mu lenda ve kusala yawu.” Yandi tubaka, “Mu fwana kuzwa lutumu yina ntete,” yandi tubaka, “samu ti mu—mu lenda ve kusala yawu. Ya kele kaka ya kuswaswana na misiku.” Mpe yandi tubaka . . .

¹⁵⁵ Papa ya yandi tubaka ti yandi vwandaka ya kuvwanda na manima kuna vwandaka kuwa, kumona yinki mwana ya bakala yayi tubaka. Mpe yandi tubaka, “Vingila fioti, mwana. Yinki yina?”

¹⁵⁶ Mpe yandi tubaka ti yandi belamaka kuna. Mpe kiboba ya bakala, Muklisto ya kieleka, muntu ya santu ya ntama ya kieleka, yandi tubaka, “Yinki ya kele, mpangi ya munu ya mbote?”

¹⁵⁷ Mpe yandi tubaka, “Tata,” yandi tubaka, “Mu kele . . . kento ya munu, yandi me belama kaka na—na kubuta.” Yandi tubaka, “Mu—mu kele . . . Mu kele na muswa ya dokotolo awa; nkisi mosi, yandi fwana kuzwa yawu malu-malu yayi.” Mpe yandi tubaka, “Mu—mu nataka yandi kuna na kivinga.” Mpe yandi tubaka, “Mu—mu . . . Tala ndonga yayi,” yandi tubaka, “Mu ke tula ntembe ti mu ke kota kuna, na manima ya midi yayi.” Yandi tubaka, “Mu ke kukiyufula kana—kana nge lenda ndima yayi samu na munu?” Yandi tubaka, “Mu ke—mu ke telama kuna; mu ke—mu ke baka mbongo samu na beno, mukanda yina ke tuba ti comté ke futa samu na yawu.”

¹⁵⁸ “Samu na yinki,” yandi tubaka, “ya kieleka, tata, mu ke nata yawu samu na nge.” Mpe yandi kitisaka kaka mukanda, yandi vutukaka na manima. Yandi tubaka ti mwana ya yandi ya bakala me vutuka na kisalu mpe me banda na kusadisa muntu yankaka.

¹⁵⁹ Yandi tubaka, “Mama yayi ya ntwenia talaka kuna, mbala zole to tatu. Yandi vwandaka kaka ya kutelama kuna, mpe vwandaka basika mutoki na kizizi ya yandi, ya zabaka ti yandi vwandaka ya kubela mingi. Mpe mpangi-bakala yina me telama kuna na maboko ya yandi na nziunga ya yandi, beno zaba, yandi tubaka, ‘Kanga ntima, cherie, ntangu yayi vingila fioti.’ Yandi tubaka, ‘Pharmacien ya mbote ke natila beto nkisi.’”

¹⁶⁰ Yandi tubaka, “Mu me yidika bankisi na nswalu nionso, mpe mu me ndima mukanda ya munganga.” Mpe yandi tubaka, “Ntangu mu bandaka na kupesa yawu na diboko ya yandi,” yandi tubaka, “Mpangi Branham, mu talaka mpe mu vwandaka tula yawu na maboko ya bamputa ya bansonso.” Yandi tubaka, “Mu monaka bansende na mbunzu ya Yandi.” Yandi tubaka, “Mu kangaka meso ya munu, mpe mu talaka diaka.” Yandi tubaka, “Mu bakulaka kuna ti, na bambala nionso mu salaka na ‘bana yayi ya Munu ya fioti,’ ya salamaka na Yandi.”

¹⁶¹ Yandi tubaka, “Nge ke kwikila yawu?”

Mu tubaka, “Na ntima ya munu ya muvimba, dokotolo, mu ke kwikila konso mpova ya yawu.”

¹⁶² Yinki ya kele? Yandi tubaka, “Kubanda ntangu yina, Klisto ke vwandaka kulutila mfunu samu na munu. Samu, ntangu mu salaka yawu samu na kento yayi,” yandi tubaka, “ya vwandaka diambu ya ngitukulu. Kele na ntembe ve ti bantu ya nzutu ke kwikila yawu ve, kasi,” yandi tubaka, “Mu banzaka, mu ke tuba yawu na nge, samu mu zaba ti nge vwandaka na banzingulu yina.”

Mu tubaka, “Yinga, tata. Ya kieleka,” mu tubaka.

¹⁶³ Mu ke bambuka moyo, ntangu, Santu Martin, mu vwandaka tanga disolo ya yandi. Ntangu yandi vwandaka kaka mwana ya bakala, ba bokilaka yandi na Nzambi. Bantu ya Yandi vwandaka mimpani. Mpe tata ya yandi vwandaka—vwandaka mutindu ya, oh, mu zaba ve, mu banza ti soda, mpe—mpe ya kele ya kulunga samu na bana ya bawu ya babakala na kulanda bawu. Yandi tubaka . . . kilumbu mosi yandi vwandaka tambula na kati ya mbanza kuna. Mu me zimbana kisika ya vwandaka kuna. Mpe mu banza ti yandi vwandaka muntu ya France. Mpe yandi tubaka ti yandi vwandaka luta na dibulu; ya vwandaka na kiboba mosi ya bakala vwandaka ya kulala kuna, yina vwandaka kufwa na madidi, madidi vwandaka mingi. Mpe bantu vwandaka luta na lweka, ba vwandaka pesa yandi kima mosi ve. Mpe yandi tubaka ti yandi telemaka kuna. Mpe bantu vwandaka kieleka tuba ti ba vwandaka bakwikidi, mpe ba vwandaka luta na lweka, ba vwandaka bika kiboba ya kulala kuna. Mpe yandi vwandaka lomba kima mosi samu na kufika, yandi tubaka ti yandi vwandaka kufwa na madidi.

¹⁶⁴ Mpe Santu Martin kwendaka kuna, na ntwala ya yandi balula ntima, ntangu yayi, yandi bakaka kazaka ya yandi mosi, yandi yina vwandaka soda, mpe zengaka yawu na kati-kati na bitini zole mpe vingaka yawu kiboba yayi ya muntu ya bala-bala, mpe yandi vingaka kitini yina yankaka. Bantu vwandaka seka yandi, ba vwandaka tuba, “Tala soda ya ngitukulu, yina me lwata kitini ya kazaka.” Beno me mona, ya ke sala ti beno kusala mambu ya ngitukulu. Ya vwandaka na kima mosi na kati ya yandi, ti yandi vwandaka kwikila ti ya vwandaka na Nzambi.

165 Na mpimpa yina, na manima yandi vutukaka mpe lalaka mwa ntangu fioti, yandi vumbukaka na mpongi. Muntu mosi vumbulaka yandi, mpe yandi talaka. Yandi telemaka kuna pene-pene ya mbeto ya yandi, mpe Yesu telemaka na kitini yina yankaka ya kazaka. Yina vwandaka mbandukulu ya Santu Martin.

166 Yinki ya vwandaka? Yandi vwandaka na Dikunzi, ti Ndinga ya Nzambi kele kieleka. “Yina beno ke sala na bana ya Munu yayi ya fioti, beno ke sala yawu na Munu.” Mpangi-bakala, mu me kangama na Dikunzi yina. Mpe mu zaba ti mosi na mosi ya beno. . .

167 Na kisika kuvwanda na lubokilu na autel, na suka yayi, mu banza ti mu ke zola vwanda na lubokilu ya kukipesa. Beto kukipesa beto mosi na Dikunzi yayi. Beno ke kwikila ti Ndinga kele Dikunzi ya Nzambi? Beno ke kwikila ti Yandi kele mutindu mosi bubu yayi ti Yandi me vwandaka ntete?

168 Ya kele na balongi na kati awa, beno zola ve kupesa baluzingu ya beno, kaka, kaka, samu na kubaka Dikunzi? Yinki beto ke na yawu nsatu bubu yayi? Samu na yinki beto ke zola vwanda na kalati ya kimpangi to kalati ya mambele? Beto zola Yesu Klisto. Beto kele ve ya kukangama na kalati ya kimpangi. Beto kele ya kukangama na Ndinga ya Nzambi, “Yesu Klisto mutindu mosi mazono, bubu yayi, mpe kukonda nsuka.” Beno ke kwikila yawu?

169 Beto telema kaka ntangu yayi mpe beto pesa baluzingu ya beto. Mu zola pesa ya munu, mpe. Mu ke kangama, diaka. Mu ke fiongonina dizita ya munu, samu na kundima ti dizita kele ya kukanga mbote-mbote. Mu ke fiongonina dikunzi ya munu. “Mfumu, kana ya kele na kima na kati ya munu, na nganda ya Ndinga ya Nge, basisa yawu. Mu zaba kima yankaka ve kasi Nge. Mu zola zaba kima yankaka ve kasi Nge.” Ntangu yayi, mosi na mosi, na mutindu ya beno mosi.

170 Mu me tuba na beno na kati ya sabala. Mu me tuba na beno Kieleka. Nzambi me siamisa Kieleka. Yandi me sala yawu mbala mingi mpe mingi, mpe mingi diaka. Beno zaba yina Dikunzi kele. Ntangu yayi samu na beno mpe munu, kintwadi, beno nionso bakento, beno nionso babakala, bana-babakala, bana-bakento, nionso yina beno kele, beto nionso yina, beto ndima; beno nionso bamambele ya chorale, beno nionso—nionso awa, bisika nionso, kintwadi; kuna na nsi ya kave, na zulu na balcon, na lweka ya bibaka, na manima na dipapu; bisika nionso beto kele, beto ndima Yesu, Dikunzi ya beto, samu beto fwana kuma na biwanda ya kivudi ya lufwa. Mu zaba kima yankaka ve kasi Yandi. Yandi kele Dikunzi ya munu, samu Yandi me vumbuka na luzingu ya munu mpe mu zaba ti Yandi kele kieleka.

171 Beto telemisa kaka maboko ya beto ntangu yayi mpe beto sambila. Beto pesa kisalu ya beto ya kukipesa.

¹⁷² Mfumu Yesu, Ndinga ya Nge me katuka ntama, Yawu kele mbandukulu mpe nsuka. Munu ntangu yayi, na dibuundu yayi, mu me kukipesa munu mosi, ya malu-malu, na zulu ya chaire yayi bubu yayi. Mu ke lomba samu na dibuundu yayi, Life Tabernacle, samu na kukipesa. Sukisa baluswaswanu nionso, bika yawu nionso kukwenda, ti yina me lutaka bikana na ntangu me lutaka. Balongi ya Nsangu ya mbote, bayina kele na boma . . . mpe banzaka ti kima mosi ke salama. O Nzambi, beto me kangama beto mosi, na suka yayi, na Yesu Klisto Ndinga; mpe ke baka lukanu ya kuzaba kima yankaka ve kasi Klisto, mpe Yandi yina ba komaka na kulunsi. O Mbwetete ya Nord, O Mpeve-Santu, O Boussole ya Nzambi, kwisa ntangu yayi na konso ntima. Mpe beto me kukipesa beto mosi na Nge, na Nkumbu ya Yesu Klisto. Nkembo na Nzambi! Amen.

Mbote mingi, mpangi-bakala.



DIKUNZI KNG63-1201M

(An Absolute)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 1 ya Ngonda ya kumi na zole, na mvula 1963, na Life Tabernacle na Shreveport, Louisiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org